

MESYUARAT KEDUA, PENGGAJAL KEEMPAT  
PARLIMEN KEEMPAT BELAS  
2021

**HARI RABU : 8 DISEMBER 2021**

**JAWAPAN-JAWAPAN BAGI PERTANYAAN-PERTANYAAN JAWAB  
LISAN YANG TIDAK DIJAWAB DI DALAM DEWAN  
( SOALAN NO. 1, 4, 13 HINGGA NO. 43 )**

**NOTA: [RUJUK PENYATA RASMI HARIAN (HANSARD)]**

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SYED ABU HUSSIN BIN HAFIZ  
SYED ABDUL FASAL (BUKIT GANTANG)**

**TARIKH : 8 DISEMBER 2021 (RABU)**

**SOALAN**

**DATO' SYED ABU HUSSIN BIN HAFIZ SYED ABDUL FASAL (BUKIT GANTANG)** minta **MENTERI PERPADUAN NEGARA** menyatakan komitmen Kementerian terhadap pembangunan generasi anak muda India di Parlimen Bukit Gantang di bawah seliaan MITRA demi memastikan mereka tidak kebelakang dalam pembangunan ekonomi sendiri dan pendidikan selari dengan misi Keluarga Malaysia.

**JAWAPAN**

Yang Di-Pertua,

1. MITRA merupakan sebuah unit dibawah Kementerian Perpaduan Negara yang meningkatkan taraf sosioekonomi masyarakat India di Malaysia serta menyerlahkan potensi mereka yang secara langsung akan membantu kemajuan Malaysia secara lebih mampan dan menyeluruh tanpa meninggalkan kelompok tertentu dalam pencapaian tersebut.
2. Maka, komitmen kementerian terhadap pembangunan generasi anak muda India akan merangkumi seluruh Malaysia tidak kira dimana sahaja mereka berada.
3. Bagi melaksanakan hasrat tersebut, Pelan Tindakan Masyarakat India (PTMI) telah dibangunkan bagi memastikan matlamat dan hasrat memperkasakan masyarakat India dari pelbagai aspek dapat dicapai tidak terkecuali juga pembangunan anak-anak muda India khususnya golongan B40.
4. Pelan ini mengandungi lima (5) Tunjang Utama yang merupakan acuan paling penting dalam memacu masyarakat India di Malaysia dalam usaha memenuhi keperluan dan meningkatkan kedudukan sosioekonomi mereka dalam jangka masa yang akan datang.
5. Secara dasarnya, Pelan Tindakan Masyarakat India (PTMI) 2021 ini menggariskan lima (5) Tunjang Utama dalam meningkatkan taraf sosioekonomi masyarakat India di Malaysia serta menyerlahkan potensi mereka dalam membantu kemajuan Malaysia secara lebih mampan dan menyeluruh tanpa meninggalkan kelompok tertentu.
6. Lima (5) Tunjang Utama yang dimaksudkan iaitu:
  - i. **Pertama : Memperkasakan keperluan asas;**

- ii. Kedua : Meningkatkan kemenjadian setiap kanak kanak;**
- iii. Ketiga : Menaiktaraf ekonomi dan keusahawanan;**
- iv. Keempat : Memperkasakan keterangkuman sosial; dan**
- v. Kelima : Memperkasakan wanita ke arah kesaksamaan gender.**

Kelima-lima Tunjang Utama ini mempunyai 23 Strategi merangkumi semua aspek utama dalam pembangunan sosioekonomi masyarakat India di Malaysia.

7. Dalam merealisasikan pembangunan anak India, Tunjang Kedua dan Tunjang Ketiga akan dilaksanakan secara berperingkat demi memastikan kemampunan pembangunan generasi anak India dalam aspek asas pembentukan sahsiah diri seperti kepimpinan, sukan, insaniah, kebudayaan dan kemahiran tenaga kerja mengikut keperluan pasaran semasa tercapai.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : PUAN HAJAH FUZIAH BINTI SALLEH  
[KUANTAN]**

**TARIKH : 8 DISEMBER 2021 (RABU)**

**SOALAN**

Minta **MENTERI BELIA DAN SUKAN** menyatakan :-

- a) berkenaan atlet yang pergi mewakili negara ke pertandingan sukan luar negara adakah mereka mendapat gaji/ elaun/ imbuhan yang sama di antara lelaki dan wanita; dan
- b) jelaskan jumlah yang diterima mengikut jantina dan kategori sukan yang dipertandingkan

(a)

Tan Sri Yang di-Pertua,

Untuk makluman Ahli Yang Berhormat, Kementerian Belia dan Sukan (KBS) melalui Majlis Sukan Negara (MSN) telah menetapkan **Skim Elaun Latihan Atlet** bermula daripada **RM500.00 hingga RM7,500.00** bagi kesemua atlet termasuklah atlet program para bermula dari bulan Januari 2019. Skim elaun ini diberikan tanpa mengira perbezaan di antara lelaki dan wanita.

Skim Elaun ini dinilai melalui prestasi atlet di **tiga (3) temasya utama** iaitu Sukan Olimpik, Sukan Asia/ Komanwel dan Sukan SEA. Pada masa yang sama pencapaian atlet di **kejohanan individu utama** juga diberi skim elaun latihan yang setimpal tanpa perbezaan jantina.

Selain Skim tersebut, atlet-atlet juga disediakan dengan **elaun makan dan hotel penginapan** setiap kali menyertai kejohanan di peringkat antarabangsa.

(b)

MSN memperuntukkan hampir **RM1,320,900.00** sebulan untuk tujuan pembayaran elaun latihan atlet di bawah Program Latihan Atlet MSN. Seramai **809 (489 @60% lelaki dan 320 @40% wanita)** atlet normal dan para daripada sejumlah **29 jenis sukan** menerima elaun mengikut kelayakan masing-masing dengan jumlah seperti berikut :

NO	PROGRAM	LELAKI	WANITA	JUMLAH
1.	Podium	RM774,300.00	RM415,300.00	RM1,189,600.00
2.	Pelapis Kebangsaan	RM70,500.00	RM60,800.00	RM131,300.00
<b>JUMLAH</b>		<b>RM844,800.00</b>	<b>RM476,100.00</b>	<b>RM1,320,900.00</b>

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN RUBIAH BINTI HAJI WANG  
[ KOTA SAMARAHAN ]**

**TARIKH : 8 DISEMBER 2021 (RABU)**

**SOALAN**

minta **MENTERI PERPADUAN NEGARA** menyatakan tindakan konklusif yang dirancang, sedang dan akan dilaksanakan oleh Kementerian untuk terus mengukuhkan perpaduan negara.

**JAWAPAN**

Tuan Yang di-Pertua,

Kementerian Perpaduan Negara akan terus memberikan tumpuan kepada agenda penyatupaduan masyarakat untuk mengukuhkan perpaduan negara selari dengan Aspirasi Keluarga Malaysia.

1. Sebagai langkah strategik, Kementerian telah menghasilkan **Pelan Tindakan Perpaduan Negara (PTPN) 2021-2030** yang merupakan **pelan induk** kepada pelaksanaan program penyatupaduan Keluarga Malaysia.

2. Pelan ini **menggariskan inisiatif dan program** yang melibatkan kementerian dan agensi-agensi Kerajaan, badan bukan Kerajaan (NGO) dan pihak swasta, sama ada sebagai agensi peneraju mahu pun agensi pelaksana.



3. Ia dibangunkan berdasarkan lima (5) Teras strategik iaitu:

- i. **Teras 1: Memelihara Sistem Demokrasi dan Raja Berpelembagaan.**
- ii. **Teras 2: Membentuk Masyarakat yang Menghargai dan Mengamalkan Perpaduan.**
- iii. **Teras 3: Memperkasakan Sosio-Ekonomi yang Adil dan Saksama.**
- iv. **Teras 4: menjamin Keterbukaan dan Toleransi Terhadap Perbezaan Agama dan Tradisi Kebudayaan.**
- v. **Teras 5: Membina Masyarakat Progresif Melalui Sains, Teknologi dan Inovasi.**

4. Berdasarkan pelan induk tersebut, Kementerian Perpaduan Negara juga menghasilkan **KAMI @Pelan Perpaduan Keluarga Malaysia** yang memfokuskan kepada inisiatif dan program di bawah Kementerian Perpaduan Negara.

5. Pelan ini menekankan kepada **empat (4) dimensi** seperti berikut:

- i. **KARIB** - bagi meningkatkan keakraban dan perpaduan di kalangan Keluarga Malaysia.
- ii. **AKSESIBILITI** – bagi meningkatkan kebolehcapaian kepada maklumat, perkhidmatan dan kemudahan yang disediakan.
- iii. **MAJMUK** – bagi meraikan kepelbagaian yang menjadi ciri-ciri unik Keluarga Malaysia; dan
- iv. **INKLUSIVITI** – bagi meningkatkan keterlibatan dan kebersamaan Keluarga Malaysia dalam program-program sosial yang dianjurkan.

6. Pada tahun 2022, Kementerian akan memberi tumpuan kepada pelaksanaan **program-program yang telah disusun dalam KAMI @Pelan Perpaduan Keluarga Malaysia**.

7. Pelaksanaan program-program **KAMI @Pelan Perpaduan Keluarga Malaysia disokong melalui (4) modul** seperti berikut:

- i. Modul Pelaksanaan;
- ii. Modul Penilaian;
- iii. Modul Promosi dan Media; dan
- iv. Modul Pemantauan

8. Di samping itu, bagi memperkukuhkan jentera perpaduan, Kementerian telah menghasilkan pelan-pelan tindakan berikut:

- a) Pelan Pemerkasaan Kepimpinan Komuniti Rukun Tetangga 2021-2030;
- b) Pelan Pendidikan Awal Kanak-kanak Tabika Perpaduan 2021-2025;
- c) Pelan Tindakan Masyarakat India (PTMI);
- d) Modul Pengurusan dan Program Sekretariat Rukun Negara (SRN) dan Kelab Rukun Negara (KRN); dan
- e) Pelan Tindakan NGO Rakan Perpaduan (*Friends of Unity*).

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN MA'MUN BIN SULAIMAN [ KALABAKAN ]**

**TARIKH : 8 DISEMBER 2021 (RABU)**

**SOALAN**

**TUAN MA'MUN BIN SULAIMAN [ KALABAKAN ]** minta **MENTERI PEMBANGUNAN LUAR BANDAR** menyatakan kesediaan dan keutamaan Kementerian untuk menaik taraf jalan-jalan kampung di dalam daerah Kalabakan terutamanya jalan-jalan yang menjadi akses kepada penduduk Kampung Pinang Murut, Kampung Murut Batu 1, Kampung Murut Ulu Kalabakan dan Kampung Murut Batu 2 di daerah Kalabakan yang terpaksa berulang alik ke Pekan Kalabakan dalam menjalani urusan seharian.

**JAWAPAN**

Tuan Yang di-Pertua,

Untuk makluman YB, Kementerian sentiasa bersedia untuk membina, menaik taraf dan membaik pulih jalan<sup>2</sup> kampung di seluruh negara sejak projek jalan kampung ini bermula pada 1981 hingga kini. Kementerian akan terus memberi fokus dan komitmen melaksanakan projek ini kerana ia menjadi akses penting masyarakat yang dapat meningkatkan kemajuan infrastruktur dari segi fizikal, ekonomi dan sosial termasuk di daerah Kalabakan. Sebagai rekod, pada tahun 2020 dan 2021, sebanyak 26 projek jalan kampung di bawah Projek Jalan Perhubungan Desa telah dilaksanakan di Kalabakan dengan jumlah peruntukan sebanyak RM6.54juta.

Untuk makluman Yang Berhormat, setakat ini pihak Kementerian masih tidak menerima sebarang permohonan daripada Yang Berhormat. Oleh yang demikian, Yang Berhormat bolehlah mengemukakan permohonan kepada KPLB untuk tindakan seperti siasatan dan laporan lapangan terlebih dahulu bagi menentukan skop dan kos berdasarkan proses yang sedang berkuat kuasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS (2021)**

**PERTANYAAN : LISAN**

**DARIPADA : TUAN JUGAH ANAK MUYANG @  
TAMBAT (LUBOK ANTU)**

**TARIKH JAWAB : 8 DISEMBER 2021 (RABU)**

**SOALAN**

**TUAN JUGAH ANAK MUYANG @ TAMBAT (LUBOK ANTU)** minta **MENTERI PERUMAHAN DAN KERAJAAN TEMPATAN** menyatakan status pelaksanaan projek Balai Bomba Engkilili yang telah diluluskan di dalam RMK-11, adakah pelaksanaan projek akan dijalankan dalam tempoh RMK-12 ini.

**JAWAPAN**

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) melalui Jabatan Bomba dan Penyelamat Malaysia (JBPM) sentiasa berusaha untuk memastikan khidmat kebombaan terus diperkasa dan diperluas kepada seluruh rakyat terutamanya melibatkan kawasan-kawasan di luar capaian *response time*.

JBPM telah memiliki sebidang tanah seluas 1.33 ekar di kawasan Engkilili bagi tujuan pembinaan balai bomba kategori E. Projek Balai Bomba dan Penyelamat (BBP) Engkilili masih dalam perancangan JBPM dan kementerian bercadang untuk memasukkan projek ini di bawah Rancangan Malaysia Kedua Belas (RMKe-12) mengikut keutamaan. Walau bagaimanapun, pelaksanaannya bergantung kepada kelulusan agensi pusat serta keupayaan peruntukan kewangan semasa.

Pada masa kini, kawasan Engkilili mendapat perlindungan kebakaran daripada Pasukan Bomba Sukarela (PBS) 1Engkilili dengan keanggotaan seramai 32 orang ahli dan dilengkapi dengan pam angkut, peralatan asas pemadaman serta peralatan perlindungan diri (PPE) yang disediakan oleh JBPM Negeri Sarawak.

Bagi mempertingkatkan aspek keselamatan kebakaran di kawasan Engkilili, Kementerian melalui JBPM telah dan akan melaksanakan beberapa program seperti berikut:

- (i) pengwujudan **Program *Community Emergency Response Team* (CERT)** melalui inisiatif Kerajaan Negeri Sarawak yang bertujuan untuk melatih masyarakat tempatan di suatu lokaliti sebagai **pasukan bertindak awal (*first responder*)**;

- (ii) memperluaskan penubuhan **Bomba Komuniti** di mana kefahaman tentang pencegahan kebakaran, latihan kebombaan dan penyediaan peralatan asas kawalan awal kebakaran seperti alat pemadam api disedia dan dibekalkan;
- (iii) mempertingkatkan kempen kesedaran keselamatan kebakaran termasuk **Program 1 Rumah Satu Alat Pemadam Api (1RAPI), Program Sedia Urus Isi Rumah (SURI) dan penyediaan alat pengesan asap serta gas (MyAlert)** yang mana **6 program** telah dilaksanakan sejak tahun 2019 sehingga 2020; dan
- (iv) mempergiatkan **program latihan dan pencegahan** di kawasan-kawasan luar bandar/ pedalaman (*Outreach and Summer Camp*).

Sekian, terima kasih

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB PUAN FONG KUI LUN (BUKIT BINTANG)**

**TARIKH : 8 DISEMBER 2021 (RABU)**

**SOALAN**

**TUAN FONG KUI LUN [ BUKIT BINTANG ]** minta **MENTERI DALAM NEGERI** menyatakan kedudukan permohonan kad pengenalan dan kewarganegaraan oleh kanak-kanak yang salah seorang ibu bapa mereka adalah warganegara Malaysia sehingga September 2021 yang diluluskan dan ditolak.



**JAWAPAN**

Tuan Yang Di Pertua,

Untuk makluman Ahli Yang Berhormat, pengeluaran kad pengenalan oleh Jabatan Pendaftaran Negara (JPN) adalah berdasarkan Akta Pendaftaran Negara 1959 [Akta 78] dan Peraturan-Peraturan Pendaftaran Negara 1990 [PPN1990] kepada mana-mana individu yang berusia genap 12 tahun dan tidak lagi dikecualikan di bawah PPN1990.

Bagi kanak-kanak yang telah mencapai umur 12 tahun atau semua orang yang memasuki Malaysia hendaklah tertakluk kepada Peraturan 28, Peraturan-peraturan Pendaftaran Negara 1990 yang mana seseorang itu hendaklah mendaftar dalam tempoh 30 hari dari tarikh berkenaan untuk mendaftar dan mendapatkan kad pengenalan berdasarkan Peraturan 3, Peraturan-peraturan Pendaftaran Negara 1990.

Permohonan hanya akan diterima dan diproses sekiranya pemohon mempunyai dokumen yang dikeluarkan oleh Jabatan Pendaftaran Negara (JPN) seperti Sijil Kelahiran, atau Sijil Anak Angkat, atau Sijil Kewarganegaraan, atau Sijil Borang H (Daftar kelahiran luar Negara yang didaftarkan di Kedutaan Malaysia) atau Pengesahan Taraf Kewarganegaraan yang **bertaraf warganegara** selaras dengan Peraturan 4(cc), Peraturan-Peraturan Pendaftaran Negara 1990.

Berdasarkan rekod Jabatan Pendaftaran Negara (JPN) dari tahun 2017 sehingga 30 September 2021, sebanyak **24,704 permohonan kewarganegaraan** di bawah **Perkara 15A** dan **15(2)** Perlembagaan Persekutuan yang diterima dan sebanyak **1,679 permohonan telah dianugerahkan warganegara Malaysia** dan **1,024 permohonan telah ditolak**.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS, TAHUN 2021**

**PERTANYAAN : JAWAB LISAN**

**DARIPADA : DATO' SRI HASAN BIN ARIFIN [ ROMPIN ]**

**TARIKH : 08 DISEMBER 2021 (RABU)**

**SOALAN**

**DATO' SRI HASAN BIN ARIFIN [ ROMPIN ]** minta **MENTERI SUMBER MANUSIA** menyatakan apakah statistik semasa jumlah tenaga kerja asing di Malaysia memandangkan negara kekurangan tenaga kerja ini terutamanya dalam sektor perladangan. Nyatakan juga kadar pengangguran semasa sehingga suku kedua berbanding tahun 2020.

**JAWAPAN**

Tuan Yang Di Pertua,

Menurut statistik yang diperolehi Jabatan Imigresen Malaysia, Kementerian Dalam Negeri, sehingga **31 Oktober 2021** terdapat seramai **1,138,370** pekerja asing PLKS (Pas Lawatan Kerja Sementara) yang kini bekerja dalam negara kita (MyIMMs, Jabatan Imigresen Malaysia, Oktober 2021). Profil pekerja asing ini mengikut negara sumber dan sektor ekonomi adalah seperti berikut:

**Rajah 1: Jumlah Pekerja Asing di Malaysia Mengikut Negara Sumber dan Sektor (sehingga 31 Oktober 2021)**

	Negara	Sektor							Jumlah
		Pembuatan	Pembinaan	Perladangan	Perkhidmatan	Pertanian	Pembantu Rumah Asing	Lombong & Kuari	
1	Indonesia	70,113	73,271	96,871	19,569	43,267	61,167	0	<b>364,564 (32.03%)</b>
2	Bangladesh	115,430	140,540	14,644	53,668	12,720	78	3	<b>337,083 (29.61%)</b>
3	Nepal	122,512	4,619	3,571	45,663	6,136	55	5	<b>180,083 (15.82%)</b>
4	Myanmar	88,640	8,032	544	10,680	2,760	40	44	<b>110,740 (9.73%)</b>
5	India	1,422	3,767	17,251	23,277	8,832	853	0	<b>55,402 (4.87%)</b>
6	Philippines	2,356	1,344	4,540	2,742	2,727	23,570	0	<b>37,279 (3.27%)</b>
7	Pakistan	2,686	11,377	1,722	4,840	8,668	18	0	<b>29,311 (2.57%)</b>
8	Vietnam	5,752	776	21	703	375	962	0	<b>8,589 (0.75%)</b>
9	Thailand	71	134	179	3,224	1,492	252	0	<b>5,352 (0.47%)</b>
10	China	824	1,557	2	1,326	1	51	8	<b>3,769 (0.33%)</b>
11	Sri Lanka	2,484	95	67	691	55	376	0	<b>3,768 (0.33%)</b>
12	Cambodia	360	56	41	238	342	1,004	0	<b>2,041 (0.18%)</b>
13	Lao DPR	2	0	0	3	362	18	0	<b>385 (0.03%)</b>
14	Uzbekistan	0	0	0	2	0	1	0	<b>3 (0.00%)</b>
15	Kazakhstan	0	0	0	0	0	1	0	<b>1(0.00%)</b>
<b>Total</b>		<b>412,652</b>	<b>244,520</b>	<b>138,023</b>	<b>166,626</b>	<b>87,737</b>	<b>88,752</b>	<b>60</b>	<b>1,138,370</b>

Sumber : MyIMMs, Jabatan Imigresen Malaysia, Oktober 2021

## SOALAN NO: 17

Lima negara sumber utama membekalkan pekerja asing kepada industri-industri di negara ini adalah **Indonesia (364,564), Bangladesh (337,083), Nepal (180, 083), Myanmar (110,740)** dan **India (55,402)**.

Pekerja asing di negara kita digajikan dalam sektor **Perkilangan (412, 652), Pembinaan (244,520), Perladangan (138,023), Perkhidmatan (166,626), Pertanian (87,737), Pembantu Rumah (88, 752)** dan **Perlombongan & Pengkuarian (60)**.

Tuan Yang di-Pertua,

Menurut **Laporan Survei Tenaga Buruh, Malaysia, Suku Ketiga Tahun 2021** yang dikeluarkan oleh Jabatan Perangkaan Malaysia, kadar pengangguran di Malaysia pada **Suku Tahun Ketiga 2021** adalah pada **4.7 peratus (746,200 penganggur)**. Berbanding suku tahun sama tahun sebelumnya, kadar pengangguran kekal manakala bilangan penganggur meningkat sebanyak 1.2 ribu orang daripada 745,000 penganggur pada **Suku Tahun Ketiga 2020**.

Dalam kalangan penganggur pada **Suku Tahun Ketiga 2021, 88.2 peratus (658.1 ribu orang)** adalah **penganggur aktif**, naik 1.5 mata peratus daripada **86.7 peratus** pada **Suku Tahun Kedua 2021**. Bilangan **penganggur tidak aktif atau kumpulan pasif** yang percaya bahawa tiada pekerjaan yang tersedia menurun sebanyak **13.5 ribu orang** kepada **88.1 ribu orang** pada **Suku Tahun Ketiga 2021 (Suku Tahun Kedua 2021: 101.6 ribu orang)**.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN SIM CHEE KEONG [ BUKIT MERTA JAM ]**

**TARIKH : 8 DISEMBER 2021 (RABU)**

**SOALAN**

**TUAN SIM CHEE KEONG [ BUKIT MERTA JAM ]** minta **MENTERI KESIHATAN** menyatakan bilangan pekerja perubatan mengikut pecahan jenis pekerjaan, negeri, gender dan tahun iaitu dari tahun 2010 sehingga kini.

**JAWAPAN**

Tuan Yang di-Pertua,

1. Berdasarkan rekod Kementerian Kesihatan, jumlah anggota kesihatan lantikan tetap bagi tahun 2010 hingga September 2021 adalah seperti berikut:
  - (i) Tahun 2010 seramai 149,031 orang;
  - (ii) Tahun 2011 seramai 158,655 orang;
  - (iii) Tahun 2012 seramai 171,781 orang;
  - (iv) Tahun 2013 seramai 187,059 orang;
  - (v) Tahun 2014 seramai 198,021 orang;
  - (vi) Tahun 2015 seramai 205,007 orang;
  - (vii) Tahun 2016 seramai 213,022 orang;
  - (viii) Tahun 2017 seramai 210,692 orang;
  - (ix) Tahun 2018 seramai 208,156 orang;
  - (x) Tahun 2019 seramai 211,998 orang;
  - (xi) Tahun 2020 seramai 211,831 orang; dan

- (xii) Tahun 2021 (hingga September) seramai 214,534 orang.
2. Perincian mengikut negeri bagi anggota kesihatan lantikan tetap pada tahun 2021 hingga bulan September adalah seperti berikut:
- (i) Selangor seramai 25,486 orang;
  - (ii) WP Kuala Lumpur dan Putrajaya seramai 6,035 orang;
  - (iii) Johor seramai 19,567 orang;
  - (iv) Kedah seramai 13,586 orang;
  - (v) Kelantan seramai 11,937 orang;
  - (vi) Melaka seramai 6,998 orang;
  - (vii) Negeri Sembilan seramai 9,532 orang;
  - (viii) Pahang seramai 13,127 orang;
  - (ix) Perak seramai 19,593 orang;
  - (x) Perlis seramai 2,952 orang;
  - (xi) Pulau Pinang seramai 10,896 orang;
  - (xii) Sabah seramai 22,204 orang;
  - (xiii) Wilayah Persekutuan Labuan seramai 748 orang;
  - (xiv) Sarawak seramai 20,200 orang;
  - (xv) Terengganu seramai 9,983 orang;
  - (xvi) Ibu Pejabat KKM/Institusi/Hospital Kuala Lumpur/Hospital Tunku Azizah/Kolej/makmal seramai 19,095 orang; dan
  - (xvii) Perjawatan kader ke agensi lain seramai 2,595 orang.
3. Ringkasan bagi jumlah Pegawai Perubatan, Pegawai Pergigian Pegawai Farmasi, Penolong Pegawai Perubatan dan Jururawat lantikan tetap di Kementerian Kesihatan hingga 30 September 2021 adalah seperti berikut:
- (i) Pegawai Perubatan termasuk Pakar seramai 33,214 orang;
  - (ii) Pegawai Pergigian termasuk Pakar seramai 4,181 orang;
  - (iii) Pegawai Farmasi seramai 8,475 orang;
  - (iv) Penolong Pegawai Perubatan seramai 14,510 orang; dan
  - (v) Jururawat seramai 66,465 orang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : DATO' HAJI CHE ABDULLAH BIN MAT NAWI  
[TUMPAT]**

**TARIKH : 8 DISEMBER 2021 (RABU)**

**SOALAN**

**DATO' HAJI CHE ABDULLAH BIN MAT NAWI** minta **MENTERI BELIA  
DAN SUKAN** menyatakan pelan pembangunan Kompleks Sukan  
Komuniti di jajahan Tumpat bagi menggalakkan budaya cara hidup sihat  
memandangkan tidak terdapat kemudahan bersesuaian di Parlimen  
Tumpat buat masa ini.

**JAWAPAN**

**Tan Sri Yang Di-pertua,**

Buat masa ini Kementerian Belia dan Sukan (KBS) tiada perancangan khusus di kawasan Tumpat. Walau bagaimanapun, pihak Kementerian sedang mengkaji dan meneliti semua projek naik taraf dan pembinaan baru kemudahan sukan di setiap negeri. Hal ini penting dalam memastikan semua kemudahan atau fasiliti yang akan dibina dan dinaik taraf dapat memberi manfaat berganda kepada masyarakat dalam usaha berterusan KBS untuk menjadikan sukan sebagai amalan gaya hidup aktif dan cergas.

Pihak Kementerian mengalu-alukan agar Yang Berhormat mengangkat cadangan pembangunan Kompleks Sukan Komuniti tersebut kepada pihak kementerian untuk diteliti dan dipertimbangkan di bawah pelan pembangunan Rancangan Malaysia Ke-12 (RMK-12). Namun begitu, ia tertakluk kepada kelulusan pihak Unit Perancangan Ekonomi (EPU), Jabatan Perdana Menteri (JPM).

Untuk makluman Yang Berhormat juga setakat ini terdapat sebanyak 23 kemudahan sukan di kawasan Tumpat, antaranya ialah gelanggang futsal, dewan badminton dan kompleks sukan pelbagai guna yang mana 12 kemudahan sukan diuruskan oleh KBS, satu (1) buah kemudahan diuruskan oleh kerajaan negeri, sepuluh (10) buah kemudahan lagi diuruskan oleh pihak swasta/ persendirian.

Sekian terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS TAHUN 2021**

**PERTANYAAN : LISAN**

**DARIPADA : PUAN MARIA CHIN BINTI ABDULLAH  
(PETALING JAYA)**

**TARIKH : 8 DISEMBER 2021 (RABU)**

**SOALAN**

**PUAN MARIA CHIN BINTI ABDULLAH (PETALING JAYA)** minta **MENTERI PERUMAHAN DAN KERAJAAN TEMPATAN** menyatakan ia hasrat membina sebuah negara moden yang menjunjung konsep demokrasi dan pemeraksanaan rakyat, dan adakah KPKT berhasrat dan mempunyai rancangan untuk mengadakan Pilihan Raya Kerajaan Tempatan di Malaysia dan sekiranya ya, bilakah ia akan dilaksanakan.

**JAWAPAN**

**Tuan Yang di-Pertua,**

Kementerian Perumahan dan Kerajaan Tempatan (KPKT) sentiasa menyokong hasrat Kerajaan untuk membina sebuah negara moden yang menjunjung konsep demokrasi dan pemeraksanaan rakyat. Dalam hal ini, KPKT sentiasa menggalakkan semua Pihak Berkuasa Tempatan (PBT) untuk mengadakan mesyuarat penuh secara *live streaming* yang bertujuan untuk memberi peluang kepada rakyat untuk bersama-sama terlibat dalam mentadbir urus PBT dan meningkatkan keyakinan mereka terhadap ketelusan dan profesionalisme pegawai PBT dan Ahli Majlisnya. Sehingga kini, sebanyak 16 PBT telah mengadakan Mesyuarat Penuh Majlis PBT secara *live streaming*.

Walau bagaimanapun, Kerajaan hari ini tidak bercadang untuk melaksanakan Pilihan Raya Kerajaan Tempatan (PRKT). Ini kerana, sistem pelantikan Ahli Majlis PBT yang sedia ada telah berjalan dengan baik. Perbelanjaan bagi mengadakan PRKT akan melibatkan peruntukan yang besar kerana kos pelaksanaannya sangat tinggi. Kos mengadakan PRKT dianggarkan berjumlah RM2 juta bagi setiap PBT dan RM302 juta bagi kesemua 151 PBT di seluruh negara. Anggaran kos ini adalah minimum kerana tidak termasuk kos tersembunyi yang perlu ditanggung oleh agensi-agensi lain yang berkaitan seperti Polis Diraja Malaysia (PDRM) untuk mengawal keselamatan pilihan raya dan anggota Jabatan Sukarelawan Malaysia (RELA) untuk mengawal keadaan di tempat membuang undi.

Selain itu, sekiranya PRKT dilaksanakan setiap dua (2) tahun, ini akan menyebabkan fokus memberi perkhidmatan kepada rakyat terjejas memandangkan terlalu banyak masa dan tenaga ditumpukan kepada proses kempen pilihan raya.

Selama ini juga, PBT masih boleh memberikan perkhidmatan terbaik kepada rakyat tanpa PRKT dan pelaksanaan PRKT bukanlah jaminan untuk memastikan perkara tersebut. Melalui sistem sedia ada, Ahli Majlis PBT yang tidak menunjukkan prestasi yang baik boleh digugurkan atau tidak dilantik semula selepas tamat tempoh pelantikan. Pada kebiasaannya, pelantikan Ahli Majlis adalah untuk tempoh dua (2) tahun dan mereka yang menunjukkan prestasi yang rendah akan digugurkan bagi memastikan perkhidmatan kepada rakyat tidak terjejas.

Pihak KPKT melalui kerjasama Institut Latihan KPKT dan Jabatan Kerajaan Tempatan (JKT) juga ada menyediakan latihan untuk pemantapan Ahli Majlis PBT pada setiap tahun. Latihan ini bertujuan memberikan pendedahan serta hala tuju Kerajaan bagi membentuk Ahli Majlis PBT yang mampu menjalankan tugas dengan kompeten dan efektif kepada masyarakat.

Bagi memperkemaskan lagi pelantikan Ahli Majlis, KPKT sedang membangunkan garis panduan pelantikan Ahli Majlis PBT. Antara lain, pelantikan Ahli Majlis perlu memenuhi kriteria tempoh pelantikan, kelayakan akademik atau pengalaman profesional, komposisi masyarakat seperti kaum, jantina, golongan minoriti dan sebagainya.

Untuk makluman, cadangan untuk mengadakan semula PRKT bagi memilih Ahli Majlis PBT merupakan antara perkara yang dijanjikan dalam manifesto Pakatan Harapan (PH). Walau bagaimanapun, Jemaah Menteri pada 17 Julai 2020 telah bersetuju supaya cadangan ini tidak diteruskan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SRI BUNG MOKTAR BIN  
RADIN [ KINABATANGAN ]**

**TARIKH : 8 DISEMBER 2021 (RABU)**

**SOALAN**

**DATO' SRI BUNG MOKTAR BIN RADIN [ KINABATANGAN ]** minta **MENTERI KESIHATAN** menyatakan apakah pihak Kementerian akan menyalurkan peruntukan khas kepada Kerajaan Negeri Sabah dalam usaha meningkatkan peratusan kadar vaksinasi khususnya selepas berakhirnya peranan CITF Negeri dan penutupan Pusat-Pusat Pemberian Vaksin (PPV) di negeri Sabah.

**JAWAPAN**

Tuan Yang di-Pertua,

1. Bagi negeri Sabah, kesemua 16 Pusat Pemberian Vaksin (PPV) yang beroperasi sebelum ini bagi menyelesaikan pelaksanaan Program Imunisasi COVID-19 Kebangsaan (PICK) Remaja telah menamatkan operasi.
2. Selaras dengan peluasan Program Imunisasi COVID-19 Kebangsaan (PICK), pelaksanaan pemberian dos penggalak vaksin COVID-19 telah dimulakan bagi memastikan perlindungan yang optimum diperolehi oleh penerima vaksin COVID-19 di Malaysia amnya dan Sabah khususnya.
3. Dalam hal ini, strategi pemberian dos penggalak adalah melalui tiga kaedah pendekatan iaitu:
  - Pemberian secara oportunistik yang dijalankan di klinik-klinik dan hospital kerajaan;
  - Pemberian secara *after office hour vaccination (AOV)* iaitu pelaksanaan selepas waktu bekerja biasa di klinik-klinik kesihatan; dan
  - Pemberian secara *outreach* iaitu pemberian secara jangkau luar.
4. Kerajaan Negeri Sabah bolehlah menggunakan peruntukan sedia ada bagi pelaksanaan Program Imunisasi COVID-19 Kebangsaan (PICK) yang telah diberikan kepada JKN Sabah dan CITF Sabah bagi meningkatkan peratusan kadar vaksinasi di negeri Sabah. Penyaluran peruntukan tambahan akan dipertimbangkan mengikut keperluan apabila peruntukan sedia ada telah habis dibelanjakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK ROBERT LAWSON CHUAT  
[ BETONG ]**

**TARIKH : 8 DISEMBER 2021 (RABU)**

**SOALAN**

**DATUK ROBERT LAWSON CHUAT [ BETONG ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan bagaimanakah Skim Pendaftaran Perniagaan Prihatin (SPPP) memberi manfaat kepada masyarakat atau golongan peniaga.

**JAWAPAN**

**Yang di-Pertua,**

1. Untuk makluman Ahli Yang Berhormat, Suruhanjaya Syarikat Malaysia (SSM) yang merupakan agensi di bawah KPDNHEP telah mengambil langkah ke hadapan bagi menyokong usaha dan inisiatif Kerajaan untuk memudah cara serta membantu pendaftaran perniagaan melalui pengenalan Skim Pendaftaran Perniagaan Prihatin (SPPP) yang telah dilancarkan pada 23 Disember 2020. Usaha ini adalah bagi membantu kelangsungan hidup rakyat dengan menceburi bidang perniagaan. Inisiatif SPPP ini juga adalah selaras dengan agenda Program Strategi Memperkasa Rakyat dan Ekonomi (PERMEKASA) yang diperkenalkan oleh Kerajaan.
2. SSM sentiasa komited untuk membantu masyarakat yang terkesan akibat pandemik COVID-19 dengan memperkenalkan SPPP. Pengenalan SPPP juga bertujuan membantu golongan B40 yang terjejas pendapatan akibat pandemik COVID-19 dan pelajar sepenuh masa di institusi

pengajian tinggi untuk mendaftarkan perniagaan mereka secara percuma melalui pengecualian fi pendaftaran.

3. SPPP diperkenalkan sebagai sokongan dan galakan kepada masyarakat khususnya golongan B40 untuk menceburi bidang perniagaan bagi menjana sumber pendapatan alternatif kepada penggajian terutamanya apabila hilang perniagaan. SPPP bukan sahaja dapat menarik minat golongan yang terkesan untuk menceburi bidang perniagaan tetapi juga dapat membantu mereka menerokai bidang perniagaan yang berpotensi untuk menjana pendapatan.

4. Berdasarkan rekod SSM, sebanyak **18,476** permohonan SPPP telah didaftarkan di bawah Akta Pendaftaran Perniagaan 1956 dalam tempoh 1 Januari 2021 sehingga 30 September 2021. Daripada jumlah tersebut, sebanyak **13,207** permohonan adalah daripada golongan B40 dan **5,269** permohonan diterima daripada pelajar institusi pengajian tinggi sepenuh masa. Manakala sebanyak **18,225** perniagaan milikan tunggal dan **251** perniagaan perkongsian telah didaftarkan melalui SPPP dalam tempoh tersebut.

5. Sebagai galakan kepada orang ramai untuk menceburi bidang perniagaan dan memanfaatkan SPPP, SSM telah melaksanakan pendekatan proaktif melalui penganjuran Program Bimbingan Ushawan 2021 (PBU21) yang akan diteruskan pada tahun hadapan. Program ini bermatlamat untuk memberikan pendedahan mengenai amalan perniagaan yang beretika kepada golongan sasaran dan membantu mereka meningkatkan taraf ekonomi sendiri melalui aktiviti perniagaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK DR. SHAHRUDDIN BIN MD. SALLEH  
[ SRI GADING ]**

**TARIKH : 8 DISEMBER 2021 (RABU)**

**SOALAN**

**DATUK DR. SHAHRUDDIN BIN MD. SALLEH [ SRI GADING ]** minta **MENTERI KESIHATAN** menyatakan adakah polisi larangan merokok di tempat awam seperti di parlimen dan kedai makan masih dijalankan.



**JAWAPAN**

**Tuan Yang di-Pertua,**

1. Polisi larangan merokok di tempat awam seperti di Parlimen dan di tempat makan masih dikuatkuasakan sebagaimana Peraturan 11, Peraturan-Peraturan Kawalan Hasil Tembakau (PPKHT) 2004. Penguatkuasaan ini adalah selari dengan Artikel 8, *WHO Framework Convention on Tobacco Control (WHO FCTC)* yang bertujuan melindungi orang awam daripada bahaya asap rokok dan produk merokok yang lain.
2. Sepanjang tempoh pelaksanaan Perintah Kawalan Pergerakan (PKP), aktiviti merokok di kawasan larangan merokok dipantau melalui talian aduan *Whatsapp* Kementerian Kesihatan Malaysia. Bagi tahun 2021, sebanyak **1,817** aduan telah diterima bermula 1 Januari sehingga 31 Oktober dan telah dipanjangkan kepada Jabatan Kesihatan Negeri yang terlibat untuk tindakan lanjut.
3. Khusus bagi penguatkuasaan peraturan 11(1)(d) iaitu larangan merokok di tempat makan, sebanyak **168,891** premis makanan telah diperiksa dengan sejumlah **13,615** kompaun dikeluarkan bernilai **RM 3.4 juta** sepanjang tahun 2020.
4. Bagi tahun 2021, aktiviti penguatkuasaan larangan merokok turut dijalankan bersekali dengan aktiviti penguatkuasaan pematuan SOP COVID-19. Sebanyak **67,203** bilangan premis telah diperiksa dengan sejumlah **6,290** kompaun dikeluarkan bernilai **RM 1.6 juta** bagi tempoh 1 Januari sehingga 31 Oktober 2021.
5. Bagi aktiviti penguatkuasaan larangan merokok di Parlimen, sebanyak **23** aktiviti pemantauan dan penguatkuasaan dilakukan dengan kerjasama pihak Jabatan Kesihatan Negeri Wilayah Persekutuan Kuala Lumpur & Putrajaya bagi tahun 2021.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN RAMKARPAL SINGH A/L KARPAL  
SINGH [ BUKIT GELUGOR ]**

**TARIKH : 8 DISEMBER 2021 ( RABU )**

**SOALAN**

**TUAN RAMKARPAL SINGH A/L KARPAL SINGH [BUKIT GELUGOR]** minta **MENTERI KESIHATAN** berkenaan langkah-langkah segera yang diambil oleh Kementerian bagi menangani masalah kesihatan mental dalam kalangan kanak-kanak yang dikatakan terjejas dengan teruk akibat Perintah Kawalan Pergerakan sepertimana yang dilaporkan oleh UNICEF baru-baru ini memandangkan sesi persekolahan telah pun bermula.

**JAWAPAN**

**Tuan Yang di Pertua,**

1. Kementerian Kesihatan Malaysia amat prihatin dan menyedari bahawa isu kesihatan mental dalam kalangan kanak-kanak merupakan satu agenda penting dan perlu diberi perhatian serius. Justeru, KKM telah menggariskan beberapa strategi di dalam **Pelan Tindakan Strategik Kesihatan Mental Kebangsaan** bagi menangani isu dan masalah ini. Strategi yang dirangka melibatkan aktiviti seperti berikut:

**i) Sesi advokasi melalui aktiviti promosi kesihatan mental kepada kumpulan sasar.**

Sesi advokasi kesihatan mental ini adalah melibatkan kumpulan sasar di peringkat sekolah dengan menerapkan komponen kesihatan mental ke dalam sistem pendidikan melalui penyampaian pengetahuan, sikap dan kemahiran yang

bersesuaian dengan peringkat umur kanak-kanak dan remaja. Strategi ini dirancang untuk meningkatkan kesejahteraan kesejahteraan kesihatan mental di kalangan kanak-kanak.

**ii) Memperkukuhkan program kesihatan mental di sekolah menerusi Program Minda Sihat.**

Program Minda Sihat di sekolah adalah bertujuan untuk membantu kawalan emosi murid kesan daripada penularan pandemik atau dari sebarang krisis. Program ini dilaksanakan bagi mempromosikan penjagaan kesihatan mental termasuklah kemahiran daya tindak (*coping skills*) dan resilien dalam kalangan pelajar. Pelajar yang disaring dan dikenal pasti memerlukan intervensi akan dirujuk untuk rawatan lanjut.

**iii) Penganjuran kempen dan ceramah kesedaran serta kemahiran keibubapaan.**

Kempen ini dianjurkan dengan kerjasama bersama KPWKM yang mengetengahkan kemahiran keibubapaan, program advokasi serta penerapan nilai murni kekeluargaan.

**iv) Sesi libaturus bersama agensi yang berkaitan.**

Sesi libat urus (*engagement*) juga telah dilaksanakan bersama pelbagai Kementerian dan agensi seperti Kementerian Pendidikan, Kementerian Pembangunan Wanita Keluarga dan Masyarakat (KPWKM), Kementerian Komunikasi dan Multimedia, Institut Penyelidikan Pembangunan Belia (*IYRES*) di bawah Kementerian Belia dan Sukan serta pihak NGO seperti *NGO Child Care* bagi menangani isu permasalahan kesihatan mental di kalangan kanak-kanak dan remaja secara bersepadu.

2. Kementerian Kesihatan juga turut memantau pelaksanaan program melalui Pelan Strategik yang dinyatakan melalui laporan KPI 100 Hari Kementerian Kesihatan Malaysia. Terdapat 3 KPI yang ditetapkan melibatkan program kesihatan mental iaitu:

- i) Penambahan sebanyak 10 NGO (iaitu peningkatan sebanyak 50% daripada *baseline* – 20 NGO) yang terlibat dalam program

## SOALAN NO : 24

advokasi kesihatan mental. Sehingga 3 Disember 2021, penambahan sebanyak 11 NGO telah dapat dicapai yang membawa kepada sejumlah 31 NGO yang terlibat dalam program advokasi kesihatan mental.

- ii) Peningkatan sebanyak 5 agensi (iaitu sebanyak 50% daripada *baseline* – 10 agensi) yang memberikan perkhidmatan bantuan sokongan psikososial. Sehingga 3 Disember 2021, sejumlah 17 agensi secara keseluruhannya menyediakan perkhidmatan bantuan sokongan psikososial untuk orang ramai.
- iii) Usaha untuk tidak menjenayahkan cubaan bunuh diri (*decriminalisation of suicide attempt*) yang mana sehingga kini, sebanyak 2 sesi libat urus telah dilaksanakan bersama pihak berkepentingan dan KKM telah menyediakan memorandum Jemaah Menteri Moratorium terhadap kesalahan cubaan bunuh diri di bawah Seksyen 309 Kanun Keseksaan [Akta 574].

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS, TAHUN 2021**

**PERTANYAAN : LISAN**

**DARIPADA : TUAN ABDUL LATIFF BIN ABDUL RAHMAN  
[ KUALA KRAI ]**

**TARIKH : 08 DISEMBER 2021 (RABU)**

**SOALAN**

**TUAN ABDUL LATIFF BIN ABDUL RAHMAN [ KUALA KRAI ]** minta **MENTERI SUMBER MANUSIA** menyatakan jumlah permohonan bagi Program Subsidi Upah 3.0 dan 4.0 (PSU 3.0 dan PSU 4.0) dan jumlah permohonan yang diluluskan termasuk wang yang disalurkan sehingga kini berbanding PSU 1.0 dan PSU2.0

**JAWAPAN**

**Tuan Yang di-Pertua,**

Berdasarkan statistik Sistem Insurans Pekerjaan (SIP) PERKESO, jumlah permohonan majikan untuk **Program Subsidi Upah 3.0 dan 4.0** sehingga 31 Oktober 2021 adalah sebanyak **236,721** permohonan. Jumlah permohonan yang diluluskan adalah sebanyak **203,602** yang melibatkan bayaran keseluruhan sebanyak **RM4.69 bilion**.

Manakala bagi permohonan **Program Subsidi Upah 1.0 dan Program Subsidi Upah 2.0**, jumlah permohonan yang diterima adalah sebanyak **340,071** permohonan. Jumlah permohonan yang diluluskan adalah sebanyak **327,355** dengan bayaran sebanyak **RM14.22 bilion**.

Jumlah peruntukan yang telah disalurkan oleh Kerajaan sehingga **5 November 2021** adalah sebanyak **RM18.91 bilion**.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB DATUK SERI PANGLIMA WILFRED MADIUS  
TANGAU (TUARAN)**

**TARIKH : 8 DISEMBER 2021 (RABU)**

**SOALAN**

**DATUK SERI PANGLIMA WILFRED MADIUS TANGAU [ TUARAN ]** minta **MENTERI DALAM NEGERI** menyatakan berapakah bilangan (mengikut negara asal) pemegang dokumen IMM13 di seluruh negara dan berapakah sebenar orang Filipina di Sabah yang berstatus pelarian perang.

**JAWAPAN**

Tuan Yang Di Pertua,

Untuk makluman Ahli Yang Berhormat, jumlah pemegang Pas Lawatan IMM13 di seluruh negara adalah seramai 53,997 orang iaitu warganegara Filipina adalah seramai 51,645 orang, warganegara Syria seramai 2,332 orang dan warganegara Thailand seramai 20 orang.

Menurut proses semak silang yang dilakukan antara Jabatan Imigresen Malaysia Negeri Sabah, Majlis Keselamatan Negara Negeri Sabah dan Jabatan Ketua Menteri Sabah, jumlah pelarian Filipina di Sabah adalah seramai 136,055 orang.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK ZAKARIA BIN MOHD. EDRIS @  
TUBAU [LIBARAN]**

**TARIKH : 8 DISEMBER 2021 (RABU)**

**SOALAN**

minta **MENTERI PEMBANGUNAN USAHAWAN DAN KOPERASI** menyatakan bagaimanakah aspirasi Dasar Keusahawanan Nasional 2030 (DKN2030) memenuhi aspirasi Keluarga Malaysia dan RMK-12 dalam usaha melahirkan usahawan, serta mempertingkatkan keseimbangan ekonomi di wilayah kurang membangun.

**JAWAPAN**

Tuan Yang di-Pertua,

1. Dasar Keusahawanan Nasional 2030 (DKN 2030) telah menggariskan lima (5) objektif utama bagi aspirasi pembentukannya iaitu:

- (i) Mewujudkan ekosistem keusahawanan yang holistik dan kondusif bagi menyokong agenda pembangunan sosioekonomi yang inklusif, seimbang dan mampan;
- (ii) Membentuk masyarakat yang berpemikiran dan berbudaya keusahawanan;
- (iii) Meningkatkan bilangan usahawan negara yang berkualiti, berdaya maju, berdaya tahan, berfikiran global dan kompetitif;

## SOALAN NO : 27

- (iv) Mempertingkatkan keupayaan Perusahaan Mikro, Kecil dan Sederhana (PMKS) serta koperasi; dan
- (v) Menjadikan keusahawanan sebagai kerjaya pilihan.

2. Untuk makluman Yang Berhormat, Aspirasi DKN 2030 ini telah diselaraskan dengan bidang keutamaan utama di bawah Rancangan Malaysia Kedua Belas (RMKe-12) iaitu mempertingkat keupayaan usahawan dan perusahaan melalui strategi pelaksanaan seperti:

- (i) Mewujudkan usahawan yang inovatif dan mampan;
- (ii) Menggalakkan penyertaan inklusif melalui Perusahaan Mikro, Kecil dan Sederhana (PMKS), Koperasi dan Persatuan berasaskan pertanian; dan
- (iii) Mewujudkan ekosistem keusahawanan yang kondusif dan menyeluruh.

3. Selaras dengan aspirasi Keluarga Malaysia melalui usaha mempertingkat keseimbangan ekonomi antara wilayah kurang membangun seperti yang digariskan dalam RMKe-12, program keusahawanan akan diperkukuh untuk mewujudkan lebih banyak perniagaan baharu dan penciptaan pekerjaan baharu. Inisiatif ini selari dengan objektif Wawasan Kemakmuran Bersama 2030 untuk memastikan penyaluran bantuan yang inklusif merentasi semua peringkat kumpulan pendapatan, etnik dan wilayah.

Sekian, terima kasih.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB TUAN WONG CHEN (SUBANG)**

**TARIKH : 8 DISEMBER 2021 (RABU)**

**SOALAN**

**TUAN WONG CHEN [ SUBANG ] minta MENTERI DALAM NEGERI menyatakan :-**

(a) adakah Kerajaan dapat mengesahkan bahawa Jho Low kini berada di negara China; dan

(b) apakah langkah-langkah yang diambil untuk mengekstradisi dia untuk menghadapi perbicaraan di Malaysia.

**JAWAPAN**

Tuan Yang Di Pertua,

Buat masa ini, berdasarkan siasatan pihak PDRM, dipercayai Jho Low tidak berada di Malaysia serta tidak berada tetap di satu-satu tempat di luar negara tetapi bergerak dari satu tempat ke satu tempat yang lain dalam usaha menghalang daripada dikesan serta menyukarkan pihak berkuasa menjalankan siasatan.

Yang Berhormat,

Antara langkah yang diambil untuk mengesan dan membawa balik Jho Low ke negara ini adalah dengan memasukkan penama dalam senarai “Red Alert” INTERPOL sejak 25 Mei 2018. Selain itu, Kementerian juga bekerjasama dengan pihak berkuasa luar negara bagi mengesan keberadaan individu berkenaan.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN SYED SADDIQ BIN SYED ABDUL  
RAHMAN (MUAR)**

**TARIKH : 8 DISEMBER 2021 (RABU)**

**SOALAN :**

**TUAN SYED SADDIQ BIN SYED ABDUL RAHMAN (MUAR)** minta **MENTERI KESIHATAN** menyatakan jumlah peruntukan kewangan bagi tujuan pembelian vaksin termasuk dos tambahan atau *booster*. Apakah juga perincian persetujuan dengan syarikat Merck bagi pil COVID-19 Molnupiravir dan bila akan Kementerian bentangkan terma dan syarat persetujuan ini.

**JAWAPAN**

Tuan Yang di-Pertua,

1. Kerajaan telah menempah sebanyak 87.9 juta dos vaksin melalui Fasilitas COVAX dan secara rundingan terus dengan beberapa pengeluar vaksin COVID-19 yang melibatkan implikasi kewangan sebanyak RM4.64 bilion bagi tahun 2021 hingga 2022. Selain itu, Kerajaan juga sedang mempertimbangkan untuk melaksanakan perolehan ubat antiviral COVID-19 iaitu Monupiravir dan pada masa yang sama terdapat beberapa syarikat juga telah mengemukakan tawaran kepada Kerajaan dan sedang dalam penelitian aspek teknikal.
2. Sehingga 7 Disember 2021, Merck Sharp & Dohme (MSD) (Malaysia) Sdn. Bhd. masih belum mengemukakan permohonan pendaftaran produk kepada Bahagian Regulatori Farmasi Negara (NPRA) bagi ubat anti-viral Molnupiravir. Pihak MSD memaklumkan, permohonan pendaftaran akan dikemukakan pada tahun 2022.
3. *Confidentiality Agreement* telah ditandatangani pada 4 Oktober 2021 bagi membolehkan rundingan awal dimulakan dengan KKM bagi perolehan ubat oral antiviral Molnupiravir keluaran syarikat MSD.
4. Memandangkan Kerajaan Malaysia terikat dengan *Confidentiality Agreement* iaitu syarat kerahsiaan yang ditetapkan syarikat pengeluar ubat Molnupiravir, maklumat terperinci perjanjian tidak boleh didedahkan termasuklah harga ubat.
5. Kementerian masih dalam pertimbangan untuk melaksanakan ubat antiviral COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS, TAHUN 2021**

**PERTANYAAN : JAWAB LISAN**

**DARIPADA : TUAN HASSAN BIN ABDUL KARIM  
[ PASIR GUDANG ]**

**TARIKH : 08 DISEMBER 2021 (RABU)**

**SOALAN**

**TUAN HASSAN BIN ABDUL KARIM [ PASIR GUDANG ] MINTA  
MENTERI SUMBER MANUSIA** menyatakan adakah Kerajaan bercadang  
untuk melaksanakan Jaringan Keselamatan Sosial di bawah PERKESO  
ke atas pekerja-pekerja gig *e-hailing* dan *p-hailing*.

**JAWAPAN**

**Tuan Yang Di Pertua,**

Kerajaan melalui PERKESO sememangnya telah melaksanakan perlindungan keselamatan sosial ke atas individu yang menjalankan pekerjaan sendiri (*self-employed*) di bawah peruntukan Akta Keselamatan Sosial Pekerjaan Sendiri 2017 (Akta 789) yang berkuatkuasa mulai 1 Jun 2017.

Melalui akta ini, mana-mana pekerja yang menjalankan pekerjaan sendiri (*self-employed*) termasuklah pekerja gig *e-hailing* dan *p-hailing* dilindungi di bawah Skim Keselamatan Sosial Pekerjaan Sendiri (SKSPS) dan adalah layak menerima faedah Skim Bencana Pekerjaan yang terdiri daripada:

- i. Faedah Perubatan;
- ii. Faedah Hilang Upaya Sementara;
- iii. Faedah Hilang Upaya Kekal;
- iv. Faedah Orang Tanggungan;
- v. Elaun Layanan Sentiasa;
- vi. Faedah Pengurusan Mayat;
- vii. Faedah Pemulihan Jasmani / Vokasional; dan
- viii. Faedah Pendidikan.

Merujuk kepada cadangan Yang Berhormat bagi memperluaskan Jaringan Keselamatan Sosial di bawah PERKESO ke atas pekerja-pekerja gig *e-hailing* dan *p-hailing*, Kerajaan akan melihat kebolehlaksanaan penyediaan manfaat faedah berbentuk penggantian pendapatan (*replacement of income*) kepada Orang Bekerja Sendiri yang terkesan akibat kehilangan pendapatan (*loss of income*) disebabkan oleh pengurangan keperluan perkhidmatan ekonomi gig.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS, TAHUN 2021**

**PERTANYAAN : JAWAB LISAN**

**DARIPADA : DATO' HAJI MAHFUZ BIN HAJI OMAR  
[ POKOK SENA ]**

**TARIKH : 08 DISEMBER 2021 (RABU)**

**SOALAN**

**DATO' HAJI MAHFUZ BIN HAJI OMAR [ POKOK SENA ]** minta **MENTERI SUMBER MANUSIA** menyatakan apakah insentif kepada majikan untuk mengambil pekerja dari kalangan warganegara.

**JAWAPAN**

**Tuan Yang Di Pertua,**

Kerajaan telah memperkenalkan pelbagai pakej untuk memastikan kesejahteraan rakyat dan juga kedudukan ekonomi dapat kembali pulih. Program Pelan Jana Semula Ekonomi Negara (PENJANA) yang telah dilaksanakan sejak Jun 2020 bertujuan untuk merangsang permintaan pekerjaan di kalangan majikan dan meningkatkan peluang pekerjaan serta kebolehpekerjaan di kalangan pencari kerja tempatan.

Kerajaan telah menyediakan pelbagai insentif kepada majikan untuk mengambil pekerja dari kalangan warganegara. Antaranya, Program Penjana Kerjaya 3.0 yang telah bermula pada 15 Julai 2021 hingga 31 Disember 2021 bertujuan membantu peluang kerjaya menerusi 4 program seperti berikut:

- i. Program *Malaysianization* untuk menggalakkan majikan menggantikan pekerja asing dengan pekerja tempatan.

- ii. Dorongan kepada majikan untuk membuat pengambilan, kategori pekerja berusia 40 tahun ke atas, OKU dan bekas banduan.
- iii. Pengambilan pekerja berusia 40 tahun dan ke bawah.
- iv. Program Perantisan di kalangan lepasan sekolah dan graduan berumur 18 – 30 tahun.

Kerajaan juga dalam Bajet 2022 telah memperuntukkan sebanyak RM2 bilion kepada PERKESO untuk melaksanakan JaminKerja – Insentif Penggajian di bawah Sistem Insurans Pekerjaan yang dijangka akan memanfaatkan majikan melalui pengambilan seramai 300,000 pencari kerja dari seluruh negara.

Menerusi JaminKerja – Insentif Penggajian, para majikan yang menggajikan individu yang tidak aktif bekerja bakal menerima insentif sebanyak 20 peratus daripada gaji bulanan bagi tempoh enam (6) bulan pertama dan 30 peratus bagi 6 bulan berikutnya. Bagi golongan rentan pula, majikan layak menerima insentif sebanyak 30 peratus untuk 6 bulan pertama, sebelum dinaikkan kepada 40 peratus bagi 6 bulan berikutnya. Kadar insentif yang sama turut akan dipanjangkan bagi pengambilan pekerja golongan wanita yang telah mengganggur melebihi tempoh setahun, ibu tunggal dan suri rumah.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS, TAHUN 2021**

**PERTANYAAN : JAWAB LISAN**

**DARIPADA : TUAN TEH KOK LIM [ TAIPING ]**

**TARIKH : 08 DISEMBER 2021 (RABU)**

**SOALAN**

**TUAN TEH KOK LIM [ TAIPING ]** minta **MENTERI SUMBER MANUSIA** menyatakan peratusan pekerja yang masih belum menerima tahap pendapatan gaji minimum dan usaha Kementerian untuk mengatasi kekurangan ini.

**JAWAPAN**

**Tuan Yang Di Pertua,**

Bagi memastikan pelaksanaan dasar gaji minimum dipatuhi oleh semua majikan di negara ini, Akta Majlis Perundangan Gaji Negara 2011 (Akta 732) telah memberikan kuasa kepada Jabatan Tenaga Kerja Semenanjung Malaysia, Jabatan Tenaga Kerja Sabah dan Jabatan Tenaga Kerja Sarawak (JTK) untuk menjalankan penguatkuasaan dan penyiasatan berhubung pelaksanaan gaji minimum.

Mekanisme yang digunakan oleh pihak JTK bagi pemantauan dan penguatkuasaan gaji minimum yang lebih berkesan adalah seperti berikut;

- (i) pemeriksaan berkanun, yang merupakan suatu aktiviti rutin iaitu lawatan ke tempat kerja oleh pegawai-pegawai JTK bagi memeriksa aspek pematuhan undang-undang buruh oleh majikan;
- (ii) pengendalian tuntutan kes buruh di Mahkamah Buruh yang difailkan berhubung kegagalan majikan membayar gaji minimum;

- (iii) penyiasatan aduan berhubung kegagalan majikan membayar gaji minimum yang difailkan oleh pekerja di JTK; dan
- (iv) pendakwaan terhadap majikan-majikan yang masih berdegil untuk membayar kadar gaji minimum kepada pekerja.

Bagi tempoh 1 Januari 2021 hingga 15 Oktober 2021, pihak JTK telah menjalankan 19,101 pemeriksaan berkanun. Didapati sebanyak **95% majikan** telah mematuhi Perintah Gaji Minimum 2020 yang memperuntukkan kadar gaji minimum RM1,200 bagi 56 Majlis Bandaraya dan Majlis Perbandaran dan RM1,100 bagi kawasan-kawasan selain Majlis Bandaraya dan Majlis Perbandaran. Majikan-majikan yang didapati tidak mematuhi pemakaian gaji minimum, tindakan pendakwaan boleh diambil terhadap mereka selaras dengan seksyen 43 Akta MPGN [Akta 732].

JTK juga menyiasat tuntutan kes buruh yang difailkan berhubung kegagalan majikan membayar gaji minimum. Dari 1 Januari 2021 hingga 15 Oktober 2021, sebanyak **130 tuntutan kes buruh difailkan** oleh pekerja-pekerja yang mana **35 kes (27%)** telah diselesaikan manakala **95 kes (73%)** masih dalam tindakan JTK.

Selain itu, aduan kegagalan majikan membayar gaji minimum yang difailkan oleh pekerja di JTK mulai 1 Januari 2021 hingga 15 Oktober 2021 ialah **158 aduan** diterima dan sebanyak **151 aduan (96%)** telah diselesaikan serta baki **7 kes (4%)** masih dalam tindakan JTK.

Di samping itu, dari 1 Januari 2014 sehingga 15 Oktober 2021, sebanyak **702 fail pendakwaan** atas pertuduhan tidak membayar gaji minimum telah dibuka yang mana **511 kes** telah diberi izin dakwa oleh Penasihat Undang-undang JTK untuk dibawa ke peringkat perbicaraan. Daripada jumlah ini, sebanyak **404 (79%) kes** pendakwaan telah selesai dibicarakan dengan denda yang telah dikenakan oleh mahkamah kepada majikan-majikan terbabit berjumlah RM1,005,350.00. Baki 107 kes masih menunggu tarikh perbicaraan.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA 2021 PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN AHMAD BIN HASSAN (PAPAR)**

**TARIKH : 8 DISEMBER 2021 (RABU)**

**SOALAN**

**TUAN AHMAD BIN HASSAN (PAPAR)** minta **MENTERI PERUMAHAN DAN KERAJAAN TEMPATAN** menyatakan jumlah rumah PPR di Sabah, berapa yang akan ditambah bagi tempoh 5 tahun ini dan adakah Kementerian akan memperluaskan Skim Sewa untuk Beli (Rent to Own, RTO) di Sabah.

**JAWAPAN**

**Tuan Yang di-Pertua,**

Saya mengucapkan terima kasih kepada Ahli Yang Berhormat atas keprihatinan terhadap Program Perumahan Rakyat (PPR) di Sabah. Kementerian Perumahan dan Kerajaan Tempatan (KPKT) sememangnya bertanggungjawab menyediakan perumahan yang berkualiti, kondusif serta berdaya huni (*livable*) kepada pelbagai kumpulan sasar, terutamanya golongan berpendapatan rendah.

Seperti Ahli Yang Berhormat sedia maklum, program PPR yang dilaksanakan sejak 1982 adalah untuk menangani isu setinggan di bandar dan juga luar bandar. Setakat ini, Kementerian telah membina sebanyak 154 projek PPR di seluruh negara yang merangkumi 97,196 unit rumah.

Untuk makluman Ahli Yang Berhormat, bilangan pelaksanaan projek **PPR di Sabah setakat ini merupakan yang terbesar** iaitu sebanyak **33 projek yang telah siap dibina** merangkumi **23,009 unit** dan **5 projek dalam pembinaan merangkumi 3,090 unit**. Lima (5) projek PPR yang sedang dalam pembinaan di Sabah adalah seperti berikut:

- i. PPR Kiansom, Inanam (1000 unit);
- ii. PPR Jalan Tungku, Lahad Datu (650 unit);
- iii. PPR Gayang II, Tuaran (500 unit);
- iv. PPR Tagasan (500 unit); dan
- v. PPR Pitas (440 unit).

Untuk makluman Ahli Yang Berhormat jua, selaras dengan matlamat RMKe-12 iaitu untuk membina 500,000 Rumah Mampu Milik (RMM) di seluruh negara, KPKT juga telah merancang untuk membina beberapa projek PPR di Sabah. Perkara ini adalah tertakluk kepada kesesuaian lokasi, cadangan tapak oleh Kerajaan Negeri dan peruntukan sedia ada yang disediakan oleh Kerajaan Persekutuan.

Setakat ini, semua PPR di Sabah adalah di bawah kategori PPR Disewa dan tiada Skim Sewa untuk Dimiliki (*Rent to Own*; RTO). Jika terdapat keperluan, Kerajaan Negeri boleh berbincang dengan KPKT untuk mewujudkan skim RTO PPR di Sabah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : DATUK MOHAMADDIN BIN KETAPI  
[ LAHAD DATU ]**

**TARIKH : 8 DISEMBER 2021 (RABU)**

**SOALAN**

**DATUK MOHAMADDIN BIN KETAPI [ LAHAD DATU ]** minta **MENTERI PEMBANGUNAN LUAR BANDAR** menyatakan jumlah dan kos jalan raya, bekalan elektrik dan bekalan air yang dapat disediakan berbanding rancangan asal bagi tempoh RMK-11 di Parlimen Lahad Datu.

**JAWAPAN**

**Tuan Yang Di-Pertua,**

Untuk makluman Yang Berhormat, terdapat dua projek jalan yang telah diluluskan dalam RMK-11 iaitu Jalan Tawayari, Lahad Datu, Sabah yang diluluskan pada tahun 2016 serta projek Naiktaraf Jalan Segama – Northern Bypass, Lahad Datu, Sabah dengan jumlah kos kedua-dua projek adalah RM66 juta. Status semasa bagi projek Jalan Tawayari adalah dalam peringkat pembinaan dan dijangka siap pada penghujung tahun 2021. Manakala status projek Naiktaraf Jalan Segama – Northern Bypass adalah dalam proses lantikan perunding.

Bagi pelaksanaan projek Bekalan Elektrik Luar Bandar (BELB) pula, sepanjang tempoh RMK-11 terdapat satu (1) projek yang telah siap fizikal yang melibatkan enam (6) pakej sub-projek di Parlimen Lahad Datu iaitu melalui Projek Bekalan Elektrik Luar Bandar (BELB) Sambungan Talian Grid Zon 2 Negeri Sabah Tahun 2016-2017. Jumlah kos bagi keenam-enam pakej tersebut adalah sebanyak RM50.2juta.

Manakala bagi pelaksanaan projek Bekalan Air Luar Bandar (BALB), sepanjang tempoh RMK-11 terdapat empat projek yang diluluskan dimana satu (1) projek dalam pelaksanaan iaitu Projek BALB Di Kawasan Dewata, Lahad Datu, Sabah dengan kos RM22 juta dan status fizikal semasa adalah 24.61%. Manakala tiga (3) lagi projek dalam peringkat pra pelaksanaan dengan butiran seperti berikut:

- a) Projek BALB Kg. Bangingod, Kg. Sri Hak dan Kg. Telibas, Tungku, Lahad Datu, Sabah dengan kos RM17.5 juta. Projek di peringkat penyediaan dokumen tender dan akan ditender pada tahun 2022 apabila proses pengambilan balik tanah selesai sepenuhnya;
- b) Projek BALB Sistem Retikulasi Tahun 2018/2019 Negeri Sabah Bahagian Lahad Datu dengan kos RM14 juta. Projek di peringkat penyediaan dokumen tender dan akan ditender pada tahun 2022 apabila proses pengambilan balik tanah selesai sepenuhnya; dan
- c) Projek Loji Rawatan Air Sri Putatan dan Sistem Rangkaian Paip Sekitarnya, Lahad Datu, Sabah dengan kos RM167.62 juta. Projek di peringkat kerja pengukuran dan rekabentuk terperinci. Projek dijangka tender pada tahun 2023.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : DR. KELVIN YII LEE WUEN [BANDAR KUCHING]**

**TARIKH : 8 DISEMBER 2021 ( RABU )**

**SOALAN**

**DR. KELVIN YII LEE WUEN [BANDAR KUCHING]** minta **MENTERI KESIHATAN** menyatakan Rancangan Kementerian untuk memperkenalkan strategi "Saringan COVID-19 Kebangsaan" yang sangat penting dalam usaha untuk kita beralih ke fasa endemik secara selamat dan lestari.

**JAWAPAN**

**Tuan Yang Dipertua,**

1. Kementerian Kesihatan Malaysia (KKM) ingin memaklumkan bahawa KKM telah menyediakan Strategi Pengujian COVID-19 Kebangsaan yang pelaksanaannya berkuatkuasa pada 26 November 2021 dalam usaha Malaysia untuk beralih ke fasa endemik secara selamat dan lestari.
2. Strategi ini diwujudkan bagi membolehkan pembukaan semula sektor sosial dan ekonomi dengan selamat, memperkasa rakyat untuk hidup dalam fasa endemik dengan selamat dan memupuk keyakinan serta memutuskan rangkaian jangkitan COVID-19.
3. Strategi ini menggunakan empat (4) tonggak utama yang perlu dilakukan di pelbagai peringkat dan fasiliti iaitu;
  - i. Mencegah dan mengurangkan penularan jangkitan melalui

## SOALAN NO : 35

respon kesihatan awam (*Find, Test, Trace, Isolate and Support Strategy- FTTIS*) dan *Point-of-Care Testing* (POCT)

- ii. Diagnosa dan pengurusan kes dalam menyediakan rawatan klinikal bagi mengurangkan morbidity dan mortality COVID-19.
- iii. Survelan berterusan untuk memantau insiden penyakit, mengesan vaksin breakthrough *infection* dan menjalankan ujian *genomic*.
- iv. Pemerkasaan komuniti dan pihak berkepentingan dalam menjalankan saringan dalam ujian sendiri.

4. Strategi saringan di bawah tonggak ini merangkumi:

- i. Pengujian Tempat Kerja
- ii. Pengujian Sektor Pendidikan
- iii. Pengujian Perhimpunan Berskala Besar:
- iv. Pengujian Bagi Kumpulan Sasaran
- v. Pengujian bagi Pengurusan Wabak
- vi. Pengujian bagi Program Survelan

5. Keberkesanan pelaksanaan strategi ini bergantung kepada kerjasama dan tanggungjawab bersama di antara kementerian, pihak berkepentingan dan masyarakat secara keseluruhannya dengan pendekatan *all of government and all of society*.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS, TAHUN 2021**

**PERTANYAAN : JAWAB LISAN**

**DARIPADA : TUAN M. KULASEGARAN [ IPOH BARAT ]**

**TARIKH : 08 DISEMBER 2021 ( RABU )**

**SOALAN**

**TUAN M. KULASEGARAN [ IPOH BARAT ]** minta **MENTERI SUMBER MANUSIA** menyatakan :-

- (a) Perkembangan terkini pengkajian gaji minima ; dan
- (b) Adakah Modal Gaji Progresif (*Progressive Wage Model*) dan atau *Fair Wage* akan digunakan sebagai panduan dalam pengkajian gaji minima.

**JAWAPAN**

**Tuan Yang di-Pertua,**

Akta Majlis Perundingan Gaji Negara 2011 [Akta 732] memperuntukkan perintah gaji minimum hendaklah dikaji semula sekurang-kurangnya sekali setiap dua tahun. Perintah Gaji Minima 2020 dikuatkuasakan mulai 1 Februari 2020, maka kajian semula perlu dilaksanakan dalam tempoh dua tahun daripada tarikh kuatkuasa perintah tersebut. Kajian ini penting untuk melihat implikasi dan hala tuju dasar gaji minimum. Input dari hasil kajian ini juga akan dijadikan asas kepada Kerajaan untuk membuat keputusan.

Buat masa ini, Jawatankuasa Teknikal Perundingan Gaji Negara sedang meneliti dan memperhalusi data-data ekonomi dan sosio-ekonomi semasa yang berkaitan serta menjalankan rundingan dengan pihak majikan, persatuan majikan, pekerja dan kesatuan sekerja sebelum satu syor gaji minimum

dikemukakan kepada Majlis Perundingan Gaji Negara untuk pertimbangan. Laporan dapatan kajian telah dibentangkan dan dibahaskan di peringkat Majlis Perundingan Gaji Minima pada 18 November yang lalu dan perbincangan akan diteruskan dalam mesyuarat Majlis pada 9 Disember 2021 bagi membolehkan Kementerian mengemukakan syor kadar gaji baharu kepada Kerajaan untuk pertimbangan dan persetujuan melalui Jemaah Menteri.

Pertimbangan bagi penetapan kadar gaji minimum di Malaysia dibuat berdasarkan *balanced approach*, iaitu mengambil kira pandangan pelbagai pihak sama ada pekerja, majikan dan Kerajaan. Pertimbangan ini dibuat mengikut acuan kita sendiri dengan memberi keutamaan dalam menjamin kestabilan ekonomi negara dengan menjaga kepentingan semua pihak termasuk majikan dan pekerja.

Dalam keadaan Negara sedang dalam fasa pemulihan ekonomi kesan daripada pandemik COVID-19, kenaikan kadar gaji minimum perlu dilaksanakan secara berperingkat dengan nilai yang munasabah bagi memastikan pihak majikan mampu melaksanakan kadar gaji minimum yang baharu dan pekerja dapat mengekalkan pekerjaan.

Selain itu, peningkatan kadar gaji minimum yang terlalu tinggi dan drastik boleh membebankan Perusahaan Mikro Kecil Sederhana untuk membayar gaji pekerja, menjejaskan daya saing negara, menyebabkan pasaran buruh negara akan berdepan dengan cabaran untuk mencipta pekerjaan baharu yang berkualiti dan berkemahiran tinggi.

Dasar gaji minimum hanyalah salah satu dasar Kerajaan yang bertujuan membantu rakyat untuk meningkatkan pendapatan serta menampung keperluan asas. Dasar ini perlu dibantu oleh dasar-dasar Kerajaan lain yang boleh menjana peluang pekerjaan berkemahiran, peningkatan produktiviti dan pendapatan pekerja yang setimpal. Kombinasi dasar-dasar yang diperkenalkan Kerajaan diharap dapat memastikan negara kekal produktif, berdaya saing dan perkembangan ekonomi yang mampan.

Tuan Yang di-Pertua,

Bagi menjawab soalan kedua, model gaji progresif adalah diperkenalkan untuk meningkatkan gaji pekerja berpendapatan rendah melalui peningkatan kemahiran dan produktiviti. Melalui latihan dan peningkatan standard kualiti, gaji pekerja berpendapatan rendah akan meningkat. Model ini diperkenalkan di Singapura mulai tahun 2012 untuk meningkatkan gaji pekerja-pekerja yang berpendapatan rendah di sektor pencucian, keselamatan dan lanskap. Singapura setakat ini tidak melaksanakan dasar gaji minimum.

Gaji minimum yang dilaksanakan di Malaysia merupakan satu keperluan statutori yang ditetapkan di bawah undang-undang iaitu gaji terendah untuk pekerja-pekerja asas tanpa kemahiran. Bagi pekerja-pekerja yang mempunyai pengalaman kerja dan kemahiran, gaji mereka seharusnya lebih tinggi daripada gaji minimum.

Cadangan pelaksanaan model gaji progresif di negara ini memerlukan kajian mendalam selaras dengan situasi ekonomi dan perburuhan semasa. Pelaksanaan gaji progresif dan gaji minimum mempunyai objektif yang sama iaitu memberi perlindungan kepada pekerja yang menerima gaji terendah. Namun begitu, gaji progresif dilaksanakan untuk sektor dan pekerjaan tertentu sahaja, manakala gaji minimum di Malaysia dikuatkuasakan melalui undang-undang kepada semua pekerja sektor swasta melangkaui semua sektor pekerjaan.

Kerajaan terbuka terhadap setiap pandangan dan cadangan. Kementerian melalui MPGN akan meneliti cadangan penambahbaikan pelaksanaan gaji minimum agar ia benar-benar sesuai dan memberi manfaat kepada rakyat serta ekonomi negara secara keseluruhannya.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS TAHUN 2021**

**PERTANYAAN : JAWAB LISAN**

**DARIPADA : TUAN TAN KOK WAI [ CHERAS ]**

**TARIKH : 08 DISEMBER 2021 (RABU)**

**SOALAN**

**TUAN TAN KOK WAI [ CHERAS ]** minta **MENTERI SUMBER MANUSIA** menyatakan senarai industri yang berhadapan dengan kekurangan bakat yang diperlukan. Nyatakan jumlah kekurangan ini untuk setiap industri dan langkah-langkah yang diambil untuk mengatasi masalah ini.

**JAWAPAN**

**Tuan Yang Di Pertua,**

Berdasarkan statistik di Portal MYFutureJobs, industri pembuatan mencatat permintaan tenaga kerja tempatan yang tinggi. Faktor utama yang menyumbang kepada permintaan ini adalah kerana syarikat tidak dapat menggajikan pekerja asing disebabkan oleh penutupan pintu sempadan negara dan pembekuan pengambilan tenaga kerja asing oleh Kerajaan.

Sehingga November 2021, sebanyak 116,134 kekosongan jawatan telah diiklankan di Portal MYFutureJobs bagi industri pembuatan. Daripada jumlah kekosongan tersebut, jawatan *Factory Hand* mencatatkan sebanyak 47,962 kekosongan jawatan, *Glove Maker* sebanyak 5,715 kekosongan dan 1,875 kekosongan bagi jawatan *Electronic Equipment Assembler*.

Berdasarkan statistik Sistem Insurans Pekerjaan (SIP), jumlah kekosongan pekerjaan keseluruhan sehingga 19 November 2021 adalah sebanyak 2,098,779. Jumlah kekosongan pekerjaan aktif pula adalah sebanyak 422,105 kekosongan dengan jumlah pencari kerja aktif seramai 792,424 orang.

Walaupun bagaimanapun, terdapat isu ketidakpadanan tawaran pekerjaan (*demand*) dan pencari kerja (*supply*) di peringkat tahap pendidikan, kemahiran, industri, gaji dan lokasi.

Di samping itu, statistik dari SIP juga menunjukkan jurang yang agak tinggi di antara kekosongan jawatan yang ditawarkan berbanding penempatan pekerjaan mengikut industri. Sebagai contoh, kekosongan jawatan bagi industri Pertanian, Perhutanan dan Perikanan, nisbah hasil (*yield ratio*) kekosongan pekerjaan kepada penempatan yang ditunjukkan adalah sebanyak 5.21 peratus. Bagi industri Pembuatan sebanyak 8.03 peratus dan 9.74 peratus pula ditunjukkan bagi industri Pembinaan.

## SOALAN NO : 37

Nisbah hasil yang ditunjukkan di antara kekosongan jawatan yang ditawarkan dan penempatan yang berlaku mengikut industri adalah sangat rendah. Perkara ini jelas menunjukkan berlakunya **ketidakpadanan** di antara kekosongan pekerjaan dan penempatan pekerjaan dalam negara.

Pihak industri sering membangkitkan isu kekurangan tenaga kerja yang menjejaskan operasi mereka, terutamanya berikutan sekatan perjalanan (moratorium) yang dilaksanakan untuk mengawal kemasukan pekerja asing bagi mengekang penularan COVID-19 dalam negara.

Setelah Kerajaan melonggarkan syarat pergerakan dan melaksanakan pelbagai inisiatif bagi menjana semula ekonomi negara, statistik Indeks Pengeluaran Perindustrian DOSM telah mencatatkan pertumbuhan positif termasuk bagi subsektor utama seperti elektrik dan elektronik (E&E), kelengkapan pengangkutan dan pembuatan lain, dan produk petroleum, kimia, getah dan plastik.

Penularan wabak COVID-19 ini telah meningkatkan permintaan bagi sesetengah produk berkaitan perubatan seperti sarung tangan getah yang menggalakkan pihak industri sarung tangan getah untuk meningkatkan jumlah pengeluaran bagi memenuhi permintaan tinggi produk berkenaan. Selain itu, beberapa sektor lain seperti Elektrik & Elektronik dan perabot turut berkembang semasapasca COVID-19 memandangkan terdapat peningkatan permintaan terhadap produk tersebut.

Dalam proses pemulihan ekonomi negara, Kerajaan telah membuka semula semua sektor ekonomi untuk beroperasi dan menggerakkan semula ekonomi negara yang terkesan dengan impak COVID-19. Walaupun begitu, pihak industri masih menyatakan bahawa kekurangan tenaga buruh telah mengekang operasi industri dalam meningkatkan kapasiti yang optimum bagi memenuhi permintaan antarabangsa.

Pihak industri memohon untuk mendapatkan tenaga kerja tambahan dalam meningkatkan pengeluaran mereka. Walau bagaimanapun, peningkatan pengeluaran ini terbatas disebabkan oleh kekurangan rakyat tempatan yang berminat untuk menjadi operator pengeluaran di kilang-kilang tersebut dengan gaji yang ditawarkan di paras yang rendah berbanding kos sara hidup.

Kerajaan memandang serius isu berkaitan kekurangan pekerja di pelbagai sektor di Malaysia. Langkah dan inisiatif yang diambil untuk mengatasi masalah ini adalah melalui:

- i. program **Penjana Kerjaya 3.0** yang bertujuan menyediakan peluang kerjaya bagi membantu golongan mudah terjejas dengan memberi dorongan kepada majikan untuk membuat pengambilan pekerja berusia 40 tahun ke atas, OKU dan bekas banduan.
- ii. Sistem Insurans Pekerjaan (SIP) PERKESO juga menyediakan program-program bagi peningkatan modal insan dan kebolehpasaran pekerja seperti khidmat kaunseling kerjaya, pemprofilan kemahiran, penulisan *resume*, latihan persediaan temuduga, latihan kemahiran bahasa dan penyampaian serta seminar pekerjaan bagi mereka yang mencari pekerjaan.
- iii. Meluaskan **Elaun Mencari Pekerjaan (EMP)** meliputi golongan yang tidak mencarum dengan PERKESO termasuklah graduan baharu, lepasan sekolah dan pekerja sektor tidak formal yang dikenali sebagai **SIP Prihatin 2.0**.

Pencari kerja yang belum mencarum dengan PERKESO perlu mendaftar di Portal Pekerjaan Negara, **MyFutureJobs** dan perlu menghadiri temuduga terbuka sekurang-kurangnya tiga (3) kali dalam tempoh dua bulan. **Insentif EMP akan diberikan sebanyak RM300 sebulan**. Sekiranya pencari kerja kembali

bekerja atau mendapat pekerjaan melalui MyFutureJobs, **jumlah insentif sebanyak RM400** akan turut diberikan.

- iv. Pembangunan Sumber Manusia Berhad (PSMB) telah melancarkan inisiatif **PENJANA HRDCorp**. Lima (5) skim telah diperkenalkan yang terdiri daripada ***Place & Train, B40 Development, SME Development, Industrial Revolution 4.0 dan Gerak Insan Gemilang (GIG)***.

Skim-skim ini diwujudkan untuk membantu rakyat mendapat penempatan pekerjaan, *self-employed* serta menambah dan meningkatkan kemahiran mereka. Setakat November 2021, PSMB telah meluluskan sebanyak **85,527 pelatih** bagi mengikuti skim-skim yang melibatkan penempatan pekerjaan dan pekerjaan sendiri ini.

- v. **HRDCorp Placement Centre (HPC)** yang berperanan sebagai platform untuk memadankan pekerja dengan peluang pekerjaan yang tersedia oleh majikan. Setakat Ogos 2021, sebanyak **41,914 peluang pekerjaan tersedia** melalui HPC dan lebih **4,000 pekerja berjaya** ditempatkan melalui inisiatif ini.

Selain itu, Kerajaan juga sentiasa menyeru pihak industri untuk memainkan peranan yang lebih proaktif dalam meningkatkan usaha menggaji pekerja tempatan serta mengurangkan kebergantungan kepada guna tenaga asing melalui inisiatif-inisiatif berikut:

- i. menggalakkan sektor-sektor berintensifkan buruh beralih kepada penggunaan mekanisasi dan automasi bagi mengurangkan kebergantungan ke atas pekerja asing dan mewujudkan peluang pekerjaan yang memerlukan kemahiran;
- ii. penggajian pekerja asing dari mana-mana negara sumber hendaklah berdasarkan kepada keperluan sebenar industri dan sektor-sektor yang dibenarkan sahaja;



- iii. melaksanakan *multi-tier levy* pada 1 Januari 2022 dimana pengambilan pekerja asing adalah berdasarkan *Dependency Ratio Ceiling (DRC)* iaitu nisbah antara pekerja tempatan dan pekerja asing;
- iv. syarat-syarat permohonan pekerja asing diperketatkan dari segi penetapan nisbah pengambilan berdasarkan komposisi pekerja tempatan dan pekerja asing;
- v. hanya majikan yang berkeupayaan dan mematuhi standard perburuhan seperti pematuhan gaji minimum, menyediakan kemudahan penginapan beserta kemudahan asas dan tiada rekod pelanggaran kes buruh sahaja dipertimbangkan kelulusan pekerja asing. Keupayaan majikan ditentukan melalui proses saringan dan pemeriksaan Jabatan Tenaga Kerja;
- vi. mengutamakan *exit policy* penggajian pekerja asing dengan menyediakan pelan latihan kemahiran kepada pekerja tempatan, memberi keutamaan kepada mekanisme *Industrialised Building System (IBS)* dalam sektor pembinaan, peralihan kepada intensif mekanisasi dan automasi, restoran berkonsepkan layan diri dan sebagainya;
- vii. program *Technical and Vocational Education and Training (TVET)* untuk warga tempatan diperkasakan bagi melahirkan individu berkemahiran tinggi selaras dengan hasrat Negara untuk beralih daripada industri berintensif buruh kepada *high end industry*; dan
- viii. pembiayaan latihan di bawah Pembangunan Sumber Manusia Berhad (PSMB) melalui caruman levi majikan untuk melatih semula pekerja bagi meningkatkan kemahiran pekerja.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA 2021 PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : YB TUAN NIK MOHAMAD ABDUH BIN NIK  
ABDUL AZIZ [BACHOK]**

**TARIKH : 8 DISEMBER 2021 (RABU)**

**SOALAN**

**TUAN NIK MOHAMAD ABDULLAH BIN NIK ABDUL AZIZ [BACHOK]** minta **MENTERI PERUMAHAN DAN KERAJAAN TEMPATAN** menyatakan langkah penyelesaian tapak pelupusan sampah di Bachok yang mendorong kepada pencemaran alam sekitar yang ketara buat masa ini.

**JAWAPAN**

**Tuan Yang di-Pertua,**

Untuk makluman Ahli Yang Berhormat, perkhidmatan pengurusan sisa pepejal dan pembersihan awam termasuk operasi Tapak Pelupusan Beris Lalang (TPBL) di Bachok adalah di bawah seliaan Pihak Berkuasa Tempatan (PBT) iaitu Majlis Perbandaran Kota Bharu Bandar Raya Islam memandangkan negeri Kelantan tidak menerima pakai **Akta Pengurusan Sisa Pepejal dan Pembersihan Awam 2007 (Akta 672)**.

TPBL menerima sisa pepejal daripada 4 PBT iaitu Majlis Perbandaran Kota Bharu - Bandaraya Islam (MPKB-BRI), Majlis Daerah Bachok (MDB), Majlis Daerah Pasir Puteh (MDPP) dan Majlis Daerah Ketereh (MDK). Anggaran jumlah sisa pepejal yang diterima adalah 340 tan sehari.

Berdasarkan maklumat daripada Majlis Daerah Bachok, Kerajaan Negeri Kelantan telah melaksanakan pelbagai pembangunan dan penambahbaikan di TPBL dalam menambah baik operasi tapak pelupusan tersebut ke tahap sanitari *Level 3* bagi mengurangkan pencemaran di kawasan sekitar. Antara penambahbaikan yang telah dibuat adalah:

- i. membina *capping* bagi menutup sisa pepejal yang telah dimampatkan;
- ii. memasang bolong gas (*gas well*) untuk memudahkan pembebasan gas yang terhasil daripada proses pereputan sisa pepejal;
- iii. membina longkang larian *leachate* untuk menyalurkan air *leachate* ke LTP; dan
- iv. membina sel baharu dengan dilengkapi *Geosynthetics Clay Liner* (GCL) bagi mengelakkan air *leachate* dari meresap ke dalam tanah dan mengurangkan kesan negatif terhadap alam sekitar.

Satu kajian bagi pembinaan projek loji biogas untuk menjana tenaga elektrik juga akan dilaksanakan pada awal tahun 2022. Dianggarkan projek ini akan mengurangkan 60% sisa pepejal dihantar ke tapak pelupusan apabila siap kelak.

Kerajaan Persekutuan melalui agensi-agensi teknikal seperti JPSPN dan SWCorp juga bersedia untuk memberikan khidmat nasihat teknikal kepada mana-mana PBT yang memerlukan dalam usaha memastikan pengurusan tapak pelupusan yang cekap dan seterusnya menjamin kesejahteraan penduduk setempat.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA PARLIMEN, PENGGAL KEEMPAT  
PARLIMEN KEEMPAT BELAS 2021**

**PERTANYAAN : LISAN**

**DARIPADA : TUAN CHA KEE CHIN [ RASAH ]**

**TARIKH : 8 DISEMBER 2021 ( RABU )**

**SOALAN**

**TUAN CHA KEE CHIN [ RASAH ]** minta **MENTERI KESIHATAN** menyatakan secara terperinci tentang Institut Penyakit Berjangkit Malaysia yang diumumkan akan dibina di Bandar Enstek pada tahun 2022. Nyatakan apakah jenis kaji-selidik, penyelidikan dan pembangunan (R&D) yang bakal dijalankan di sini dan bilakah Institut ini akan mula beroperasi.

**JAWAPAN**

**Tuan Yang di-Pertua,**

1. Kementerian Kesihatan Malaysia telah mengemukakan permohonan bagi Projek Institut Penyakit Berjangkit Malaysia di dalam *Rolling Plan* (RP) 2, 2022 kepada Unit Perancang Ekonomi, Jabatan Perdana Menteri.

2. Projek Institut Penyakit Berjangkit Malaysia atau *Malaysia Institute for Infectious Disease* (MIID) akan berfungsi sebagai pusat rujukan bagi penyakit berjangkit seluruh negara secara amnya dan wilayah tengah khususnya. Fungsi utama MIID adalah menyediakan perkhidmatan perawatan penyakit berjangkit yang komprehensif dan berperanan sebagai pusat latihan kepakaran dan sub-kepakaran bagi kakitangan kesihatan KKM. Selain itu, MIID juga akan menjalankan kajian dan penyelidikan klinikal berkaitan dengan penyakit berjangkit.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : YB TUAN SIVAKUMAR VARATHARAJU  
NAIDU (BATU GAJAH)**

**TARIKH : 8 DISEMBER 2021 (RABU)**

**SOALAN**

**YB TUAN SIVAKUMAR VARATHARAJU NAIDU (BATU GAJAH)** minta **MENTERI PERPADUAN NEGARA** menyatakan sasaran Kerajaan bagi ekuiti kaum India dalam Rancangan Malaysia Kedua Belas. Apakah tindakan-tindakan atau program-program yang akan dilaksanakan secara spesifik untuk merealisasikan hasrat itu.

**JAWAPAN**

Yang Di-Pertua,

1. MITRA di bawah seliaan Kementerian Perpaduan Negara adalah berfokuskan kepada peningkatan sosioekonomi masyarakat India golongan B40. Bagi memastikan MITRA dapat melaksanakan peranan bagi mencapai matlamat *Malaysia Indian Blueprint (MIB)*, Kementerian Perpaduan Negara sedang membangunkan **Pelan Tindakan Masyarakat India (PTMI)**.
2. Pelan ini bertujuan untuk **menyediakan panduan pelaksanaan bagi program pembangunan sosioekonomi masyarakat India di bawah tanggungjawab MITRA**.
3. Melalui pelan ini, **lima (5) Tunjang** dibangunkan secara menyeluruh untuk melaksanakan program tindakan dan aktiviti mengikut jangka masa pendek, sederhana dan panjang yang menjelaskan indikator dan sasaran yang ingin dicapai.
4. **Lima (5) Tunjang** tersebut adalah:
  - a. **Memperkasakan Keperluan Asas** yang merangkumi membasmi kemiskinan, perumahan, kestabilan keluarga.
  - b. **Meningkatkan Kemenjadian Setiap Kanak-Kanak** merangkumi pendidikan awal kanak-kanak, pendidikan rendah SJKT, Sekolah Kebangsaan, pendidikan menengah, pendidikan tinggi dan golongan belia.
  - c. **Menaiktaraf Ekonomi & Keusahawanan** merangkumi kemahiran professional, keusahawan, peningkatan kekayaan.
  - d. **Memperkasakan Keterangkuman Sosial** merangkumi dokumentasi & kewarganegaraan, isu keagamaan & kuil,

sumbangan social kuil, dewan orang ramai, kakitangan awam, bebas jenayah dan memperbaiki persepsi; dan

- e. Memperkasakan Wanita Ke Arah Kesaksamaan Gender** dengan meningkatkan akses, penyaluran maklumat, kesejahteraan wanita dan wanita terpinggir.

5. Beberapa strategi Jangka Pendek, Jangka Sederhana dan Jangka Panjang telah digariskan dalam Pelan Tindakan Masyarakat India (PTMI) untuk mengalakkan dan seterusnya meningkatkan kadar penyertaan masyarakat India dalam pemilikan ekuiti. Antara strategi-strategi tersebut adalah seperti dibawah:

- a. Penubuhan '*ecosystem builders*' di mana para usahawan muda boleh diterapkan di bawah seorang usahawan berjaya dalam satu komuniti yang tertentu;
- b. Peningkatan program Latihan '*skill-based approach*' kepada usahawan India untuk menyampaikan pengetahuan dan kemahiran menyeluruh dalam mengembangkan perniagaan mereka;
- c. Memperkasakan jerayawara dan kempen *outreach* untuk kemahiran semula (*reskilling*) dan peningkatan kemahiran (*upskilling*); dan
- d. Meningkatkan bilangan yang berdaftar dalam Program 'Kemahiran Digital Pekerjaan Masa Depan'.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : YB DATUK SERI DR MUJAHID YUSOF RAWA  
(PARIT BUNTAR)**

**TARIKH : 8 DISEMBER 2021 (RABU)**

**SOALAN**

**DATUK SERI DR. MUJAHID YUSOF RAWA [ PARIT BUNTAR ]** minta **MENTERI DALAM NEGERI** menyatakan status 5 laporan polis ke atas penyelewengan Tabung Haji yang dibuat pada tahun 2018.

**JAWAPAN**

Tuan Yang Di Pertua,

Terdapat lima (5) laporan polis telah diterima oleh pihak Polis Diraja Malaysia (PDRM) berkenaan isu penyelewengan Tabung Haji. Jabatan Siasatan Jenayah Komersil, PDRM, berdasarkan laporan polis berkenaan telah mengklasifikasikan siasatan kepada Seksyen 409 Kanun Keseksaan iaitu pecah amanah jenayah oleh penjawat awam bagi satu (1) laporan polis, manakala empat (4) lagi diklasifikasikan di bawah Seksyen 420 Kanun Keseksaan iaitu kesalahan menipu. Kesemua kertas siasatan telah diserahkan kepada Jabatan Peguam Negara untuk kajian dan nasihat perundangan. Susulan kes masih lagi dalam siasatan, saya tidak berhasrat untuk mengulas lanjut bagi mengelakkan sebarang konflik terhadap siasatan berkenaan.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN RAMLI BIN DATO' MOHD NOR  
[ CAMERON HIGHLANDS ]**

**TARIKH : 8 DISEMBER 2021 (RABU)**

**SOALAN**

**TUAN RAMLI BIN DATO' MOHD NOR [ CAMERON HIGHLANDS ]** minta **MENTERI PEMBANGUNAN LUAR BANDAR** menyatakan apakah langkah yang akan dilakukan oleh pihak Kementerian bagi menyelesaikan masalah bekalan air bersih di seluruh kawasan Orang Asli terutamanya di Parlimen Cameron Highlands.

**JAWAPAN**

**Tuan Yang di-Pertua,**

Untuk makluman Yang Berhormat, Kerajaan berusaha untuk melengkapkan perkampungan Orang Asli dengan kemudahan bekalan air terawat semenjak pelaksanaan Rancangan Malaysia Ke10 (RMKe10). Mesyuarat Tindakan Negara (MTN) Bil. 1/2011 telah memutuskan supaya projek bekalan air terawat dilaksanakan di perkampungan Orang Asli seluruh Semenanjung Malaysia.

Sejak itu Kerajaan telah menyalurkan peruntukan kepada Jabatan Kemajuan Orang Asli (JAKOA) bagi melaksanakan projek bekalan air terawat di perkampungan Orang Asli (KOA) dengan kos keseluruhan berjumlah RM290.0 juta. Dari tahun 2011 hingga tahun 2021, JAKOA telah melaksanakan 353 projek bekalan air terawat melibatkan kerja-kerja bina baru, menaiktaraf dan membaikpulih sistem rawatan air. Jumlah KOA yang telah mempunyai bekalan air terawat

## **SOALAN NO : 42**

juga telah meningkat kepada 706 daripada 853 buah KOA yang diiktiraf.

JAKOA juga telah bekerjasama dengan rakan sinergi yang terdiri daripada agensi kerajaan yang mempunyai kepakaran seperti Bahagian Kejuruteraan, Kementerian Kesihatan Malaysia (KKM), Jabatan Mineral dan Geosains (JMG), Kementerian Tenaga dan Sumber Asli (KETSA), Institut Penyelidikan Air Kebangsaan (NAHRIM), Kementerian Alam Sekitar dan Air (KASA) dan Jabatan Kerja Raya, Kementerian Kerja Raya (KKR) bagi meningkatkan kualiti bekalan air di perkampungan Orang Asli.

Untuk makluman Yang Berhormat juga, terdapat 83 buah Kampung Orang Asli (KOA) yang diiktiraf di Parlimen Cameron Highlands. Daripada jumlah tersebut sebanyak 15 buah KOA belum mempunyai bekalan air terawat dan penduduk menggunakan bekalan air yang diperolehi dari sungai berhampiran kampung sebagai kegunaan harian.

JAKOA akan mempergiatkan usaha untuk menyediakan kemudahan bekalan air terawat di perkampungan tersebut pada masa akan datang. Pada tahun 2022 dua (2) projek menaiktaraf sistem rawatan air akan dilaksanakan di KOA Leryar dan KOA Cheros, Parlimen Cameron Highlands.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPATBELAS**

**PERTANYAAN : JAWAB LISAN**

**DARIPADA : TUAN STEVEN CHOONG SHIAU YOON  
(TEBRAU)**

**TARIKH : 8 DISEMBER 2021 (RABU)**

**SOALAN**

**TUAN STEVEN CHOONG SHIAU YOON [TEBRAU]** minta **MENTERI DALAM NEGERI** menyatakan langkah Kementerian untuk memerangi peningkatan penipuan siber dan memberi maklumat terperinci jenis dan bilangan kes penipuan yang dilaporkan serta bilangan kes tangkapan, dakwaan dan dijatuh hukuman pada tahun 2020 dan 2021 sehingga bulan September.

**JAWAPAN**

Tuan Yang Di Pertua,

Kementerian Dalam Negeri (KDN) memandang serius berhubung kes-kes yang melibatkan jenayah penipuan atas talian. Pelbagai Modus Operandi (MO) penipuan atas talian yang telah dikesan oleh Polis Diraja Malaysia (PDRM) yang dilakukan oleh sindiket antaranya seperti Belian Online, Pinjaman Tidak Wujud, Pelaburan, African Scam, Macau Scam dan *Business Email Compromise* (BEC). Pada tahun 2020, sebanyak 8,397 tangkapan telah dibuat dan sebanyak 5,772 pertuduhan telah pun dilaksanakan. Manakala, bagi tempoh Januari hingga September 2021 pula, tangkapan adalah sebanyak 7,105 orang dan 4,178 pertuduhan telah dibuat di mahkamah.

Untuk makluman Yang Berhormat juga, pelbagai usaha telah dijalankan oleh PDRM untuk memerangi sindiket penipuan seperti ini termasuklah dengan meningkatkan penguatkuasaan undang-undang, pengoperasian, tangkapan dan seterusnya menjalankan pendakwaan ke atas mereka yang terlibat dalam penipuan. Di antara langkah-langkah lain yang telah diambil dan dirancang oleh pihak polis termasuklah:

- a) Menjalankan ceramah, taklimat dan sesi dialog kepada kakitangan kerajaan, syarikat swasta dan NGO-NGO secara berkala. Sesi ini turut dijalankan secara atas talian melalui medium Facebook, televisyen dan radio;
- b) Bekerjasama dengan pihak Suruhanjaya Komunikasi Multimedia (SKMM) untuk menurunkan iklan-iklan haram berkaitan penipuan atas talian ini;
- c) Mewujudkan platform akaun Facebook "*Cyber Crime Alert Royal Malaysia Police*" untuk memberikan pendedahan kepada masyarakat mengenai skim pelaburan tidak wujud ini. Satu portal juga telah dibangunkan oleh PDRM bagi memudahkan orang awam untuk membuat semakan nombor telefon sindiket ataupun akaun-akaun

## SOALAN NO : 43

bank yang digunakan oleh sindiket dalam urusan penipuan. Portal tersebut boleh dicapai melalui pautan <http://ccid.rmp.gov.my/semakmule> dan ianya boleh dimuatnaik dengan menggunakan telefon mudah alih;

- d) Mewujudkan *CCID Scam Respond Center* di talian 0326101559 atau 0326101599 di mana orang ramai boleh membuat panggilan untuk mendapatkan maklumat dan menyemak kesahihan panggilan bagi sebarang transaksi yang meragukan. Talian ini beroperasi dari jam 09.00 pagi hingga 10.00 malam pada setiap hari; dan
- e) Mengambil tindakan di bawah Akta Pencegahan Penggubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001(AMLATFPUAA) bagi tujuan pembekuan dan pelucuthakan wang dari akaun sindiket juga diambil oleh pihak PDRM. Bagi mana-mana suspek yang tidak cukup keterangan untuk dituduh di mahkamah, mereka akan dikenakan tindakan dibawah undang-undang pencegahan seperti Akta Pencegahan Jenayah 1959 (POCA).